



+6996/B/1







34523

DISSERTATIO INAUGURALIS MEDICA

DE

# DIGITALI PURPUREA

---

Q V A M

ILLVSTRIS MEDICORVM ORDINIS CONSENSV

IN

ACADEMIA GEORGIA AVGVSTA

PRO

SVMMIS IN MEDICINA HONORIBVS RITE  
CONSEQVENDIS

DIE XV AVGVSTI MDCCLXXXVI.

DEFENDET

CAROLVS CHRISTIANVS SCHIEMANN

CVRONVS.

---

GOETTINGAE

TYPIS JOANNIS CHRISTIAN. DIETERICH.

224417156 TLX



VIRO ILLVSTRI

PRAENOBILISSIMO ATQVE EXPERIENTISSIMO

DOMINO

GEORGIO HENRICO  
BARONI DE WITTENBVRG

SERENISSIMI CVRLANDIAE ET SEMGALLIAE DVCIS

PHARMACOPOLAE AVLICO

FAVTORI SIBI SEMPER COLENDO

HASCE STVDIORVM SVORVM PRIMITIAS

D. D. D.

DEVOTISSIMVS ET OBSTRACTISSIMVS CVLTOR

SCHIEMANN.





---

DE  
DIGITALI PURPUREA.

---

PRAEFATIO.

**S**i Lectores hancce inspicient dissertationem, eamque de Digitali purpurea inscriptam legent, non dubito, quosdam fore, qui, qua re adductus in magna argumentorum copia ad elaborandam dissertationem hoc potissimum elegerim argumentum, mirentur. Hi igitur praemonendi sunt, me in

primis id in materia eligenda spectasse, vt, quantum pro virium modulo fieri posset, maxime salubris et eam ob causam quoque memoratu dignissimae plantae cognitio propagetur, et eius vsus reddatur magis communis. Quid enim conuenientius et vtilius esse potest, quam vt recens repertae medicinales vires, plantae, antea ignotae, quibus efficacissimorum augetur remediorum numerus, et quae, repetitis factis experimentis, viris probabuntur experientissimis, vbiuis magis vulgabuntur commendabunturque? — Witheringii, Viri Cl., opere de Digitalis in hydropse adhibitae diuretica efficacia, praeclare scripto et prelis excusso, ad hanc plantam describendam pronior sum factus et excitatus. Labore iam suscepto, et ex parte quadam confecto, duas eius libri versiones vernacula lingua institutas,

typis

typis iri impressas certior sum factus. Quid mihi nunc esset faciendum, ambiguus eram. Temporis breuitate, quod relictum erat exclusus, nouam et integram ad exarandum sumere materiam mihi non licebat; optimum igitur sum ratus, potius incepta ad finem perducere, praesertim cum spes, fore, vt vim illius magis perspicue intelligerem, experimentis a me institutis, non deesset; sed vna tantummodo huius plantae experiendi vim mihi obtigit, in quodam hydrope laborante, occasio, cuius morbi historiam infra addidi. Ex experimentis ab amicis factis, atque mecum communicatis, Viri experientissimi et doctissimi D. Brandis experimenta nunc modo sunt nominanda. — Chemica quod pertinet ad experimenta, omni cum cura institui. Sed quominus singulas reliquas plantae particulas v. c. semen, flores,

flores, pari modo examinarem, temporis breuitate  
sum impeditus: eadem est causa, cur iam incepta  
in brutis bestiis experimenta praeteream, quae in  
hunc inprimis institui finem, vt tutum inueniretur  
remedium ad mala ex nimia plantae copia orta,  
pellenda. Quae omnia in aliud deponam mihique  
referuabo tempus.

---



§. I.

**A**ntequam ad ipsam plantae atque eius indolis ac naturae disquisitionem me accingam, non superuacaneum mihi esse videtur, de eius antiquitate et apud veteres usu paucis differere. Quod si igitur eius cognitionem, quam antiquiores fortasse de ea habuerint, indagabimus, plane nulla comprehendemus vestigia expressa, quorum auxilio certi aliquid de aetate et apud antiquos celebritate constituere possimus. Quaecunque vero indicia luminis aliquantulum indagationi adferre a quibusdam putantur, spissa caligine et tenebris sunt inuoluta. Sunt quidem, qui existiment, eius naturam atque vires iam Dioscoridi et Plinio historiarum naturae scriptori, sagacissimo in perscrutandis naturae viribus fuisse notas: Columna enim eandem cum Dioscoridis Ephemero esse opinatur *a)*. Εφημερον siue ἱεὶς ἀγρία, inquit Dioscorides L. 4. c. 85., caulem et folia lilii habet, sed haec tenuiora: flores candidos, amaros. semen molle, radicem vnam, digitali crassitudine, longam, adstringentem, odoratam. Plinius Historiarum natur: L. 25. c. 13. de Ephemero hunc in modum disserit: Εφημερον folia habet lilii, sed minora, caulem parem, florem coeruleum, semen superuacuum, radicem vnam digitali crassitudine. Casparus

*a)* Ex Parkinson theatr. botanic. p. 653.



sparus Bauhinus huius Ephemero praeterea addit Mathioli et Lobelii ephemera quae antea ipse vtraque ignorat.

- 1) Ephemeron, quod aliqui syluestrem Irin appellant. Math. Lacunae. Cost. desc.

Ephemeron non lethale Mathioli. Lug. Tab. Ephemeron Mathioli ex spuriiis oppositis plantis esse videtur. Colum.

- 2) Ephemeron Mathioli, vel potius Ephemerum spurium, Lob. Dod.

Sed Casp. *Bauhinus* valde dubitat, an hae duae eadem sint plantae, cum illi folia lilii et radix vnica digitali crassitudine tribuantur: huic vero folia et radix Isatidis adscribatur, imo figurarum nulla est similitudo et Lobelii potius *Lysimachiam* aliquam refert *b)*, Aliam ac diuersam *Dalechampia* apud Plinium amplexus est coniecturam, eandem a Plinio *Calathianam Violam* adpellari, sic enim enuntiat *c)*: *Calathianam* ego puto esse *digitalem luteam*, flore luteo, *Calathio similem*.

In tanta opinionum et coniecturarum ad plantae antiquitatem pertinentium diuersitate, nihil prorsus certi et firmi constitui posse cuius facile apparet. Sed quid iuuat, diutius hisce in tenebris versari, cum doctissimi iidemque sagacissimi perscrutatores nihil amplius, nisi meras attulerint coniecturas. Extra omnem quidem est dubitationem, et nullo negari potest modo, nos inde a Fuchsi aetate plantae nostrae notitiam habere accuratam.

§. II.

*b)* C. B. 244.

*c)* Plinii hist. natur. Cap. VI. L. XXI. lin, 24. Adnotat. d. p. 487.

## §. II.

Profecto mirum esse videtur, Fuchsum Digitalis purpureae, neque accuratiorem, neque magis distinctam, memoriae tradidisse descriptionem, quam iure quidem ab eo expectare poteramus: pauca modo commemorat: esse caulem teretem et in vnius cubiti longitudinem extensum, in caulis latere inde a media parte ad fastigium flores ipsum circumdare, et quod ad illius aspectum attineat externum, digitali s. dactyliothecae esse similem, fuscam seu luteam: floribus vero decidentibus, semen latum et aliquantulum oblongae figurae sese ostendere, in fronte extensum apicem habens, superne bifidum, radicem esse nigram et fibris textam *d*). Hoc quoque animaduertendum esse puto, Fuchsum ob eximiam formam externam plantam hanc in systema recepisse, et ipsam ab illo accepisse nomen ab eius forma deriuatum.

Apud Casp. *Bauhinum e*) ipsam in Digitalis folio Verbasci diuisione, et nomine Digitalis purpureae folio aspero insignitam inuenies, qui simul synonyma eius commemorat haec: Campanula syluestris Tragi: Digitalis rubra. Dod. gal. purpurea Fuchf. Ang. Gesn. hort. et ap. Lon. Dod. Ad Lob. Lugd: Cam: Taber. Ger. Aralda bononiensibus. Gesner hort. Verbascum digitale Costaeo. Virga regia maior flore purpureo Caes. Ephemeris alia species maior. Col.

Joh. *Bauhinus f*) Digitalem purpuream cognominauit, eamque tali descripsit modo. — “Est vbi cubitos duos superat Digitalis purpurea, caule pollicem crasso, anguloso, hirsuto,

B 2

subru-

*d*) *Kräuterbuch*. cap. 345.

*e*) L. c. p. 243.

*f*) *Historia plantarum* p. 812.

subrubente concauo, ex radice fibrosa, amara: flores in thyrsi longioris morem, frequentes, ab vno caulis latere penduli, breuibus hirsutis pediculis, quorum singulis est oppositum foliolum acuminatum, calathi aut digitalis fartorii munimenti effigie, colore foris coccineo, excepta inferiore parte, quae propter nonnullam admixtam albedinem carneo praedita est, intus vero similiter purpurei, inferiore parte (quae longis pilis obsita est) versicolore albis maculis nigro guttatis: floris basi penitus ad nascuntur stamina alba aut purpurascencia; contorta, quae apices didymos croceos guttatos sustinent. Stylus tenuis purpurascens ex hirsuti oblongique pericarpium bialuis mucrone protenditur, cui postea inclusum continetur semen minutum. Folia Verbasci opinionem recte sustineant oblonga, in acumen desinentia, hirsuta, in ambitu serrata, superne atrouirentia, inferne incana: quae ad radicem sunt, longis nituntur pediculis, quae in caulibus nullo ordine posita crebra. Calix floris plerumque quinque folius. Floris margo in quinque diuiditur segmenta." Eandem quoque descriptionem e Johannis *Bauhini* libris excerptam legis in historiis plantarum a Raio scriptis g).

### §. III.

Neminem fore puto, qui dubitare queat. quin medico distincta et botanica plantae, in praxi medica adhibitae, notitia maxime sit necessaria. Quoties enim fieri solet, ut plantae diuersae quidem misceantur et commutentur, cum aliis vim alienam imo contrariam exserentibus. Haud quidem negandum est, hac ratione medicam plantae efficaciam et salutarem interdum esse repertam, quae antea plane erat ignota, et fortasse per diuturnum adhuc latuisset tempus. Verum tamen incuria et negligen-

g) p. 767. hist. plant.



gligentia in accurata adipiscenda plantarum cognitione hoc excusari non potest; casu enim fortuito et secundo accidit. Quis est vero, qui mala e tenui plantarum cognitione saepissime orta non statim videat? — Ante omnia autem saepissime Digitalis purpurea cum Verbasco commutari solet. Sic Celeb. Withering amborum folia inter se confundi animaduertit, eadem accidere potest permutatio cum Symphyto. Ego quidem id experientia edoctus sum, cum aliena folia ad experimenta a me instituenda, ab illis sint adlata, quibus colligendi ea negotium mandaueram. Equidem suspicor, cum quarumdam Conyzae specierum foliis facile quoque posse confundi.

Cum igitur maxime sit verendum, ne, vt modo vidimus, eiusdem generis cum aliis commutetur plantis, descriptionem non superuacuum esse censui.

#### §. IV.

*Descriptio Digitalis purpureae* LINN. ex comparatione plurium exemplorum sponte crescentium h).

*Radix* ramoso-fibrosa, fibris longis horizontalibus, ad basin ex reliquiis foliorum squamosa, tenax, alba, epidermide fordide lutea.

*Caulis* simplex (et vix nisi in planta culta ramosus), bipedalis et ultra, calamus cygneum crassus, ascendendo sensim angustior, subangulatus ex descendente costa foliorum, ceterum teres, erectus, strictus, tomentosus, purpurascens, fistulosus, foliosus.

B 3

*Folia*

h) Non possum non animaduertere, hancce plantae descriptionem a me exaratam, ab Illustri Equite Murray, Praeceptor e venerando, emendatam et auctam esse.

*Folia* plurima, in planta florente modo caulina, antea et radicalia multa, ovato-oblonga, supra viridia, subinde purpureo-nigricantia, subtus tomentoso-incana, mollia, acuminata, inaequaliter crenata, venosa, patentissima, alterna, basi contracta, subdecurrentia: superiora sessilia; amplexicaulia, inferiora degenerantia in *petiolum* alatum costa carinata, dilute purpureum, tomentosum.

*Inflorescentia*: Racemus terminalis, caulis (et ramorum, si adsunt) secundus, multiflorus, subinde adeo pedalis, floribus dependentibus, inferis.

*Pedunculus* communis tomentosior, teres.

*Pedicelli* teretes, apice incrassati et cernui, lineas duas longi, villosi, solitarii, alterni, per maturationem fructus erecti et stricti.

*Bractae* sub hisce ovato-lanceolatae, acuminatae, integerri-mae, pubescentes, lineatae, reclinatae, amplexicaules, pedunculis paullo longiores.

*Calyx* quinquepartitus, patens, pubescens, lineatus, persistens, laciniis quatuor inferioribus ovatis acutis, superiori lanceolata, acuminata.

*Corolla* monopetala, recurva, sesquipollicaris, ex tubo subcylindrico albo, calycem aequante, ventricoso-campanulata, extus purpurea, intus deorsum notata maculis ocellatis albis, centro profunde rubro, et pilis longis albis; limbo quadrifido inaequali, subringente, pallidiori, cuius lacinia suprema truncata, vix emarginata, laterales semicir-



micirculares minimae, infima reliquis magis protuberans, omnes obtusae.

*Stamina* quatuor, quorum duo longiora reliquis, corolla dimidio breviora: *Filamenta* tubo corollae inserta, tum incurua, sursum versa, alba, compressa, linearia; *Antherae* deorsum bipartitae, luteae, purpureo-maculatae, oblique insidentes, particula quavis ovato-oblonga, subcompressa.

*Pistillum* vnum, staminibus paullo longius: *Germen* ovato-oblongum, villosum; *Stylus* sursum ascendens, subteres, pubescens, purpurascens; *Stigma* bifidum, laciniis patulis.

*Capsula* ovata, mucronata, sulco vtrinque duplici, bivalvis, bilocularis.

*Semina* numerosa, parva (HALLERVS ea vocat fere quadrata, quam quidem figuram iam, quum nondum matuerint, determinare nequeo).

### ANIMADVERSIONES.

Cultura vt in horto botanico conspiciere vacat, planta ramosa fit ramis multis, alternis, circiter dodrantalibus, saepe inflexis, patentissimis, quaquaversum directis, tum tam speciosa, vt inter elegantissimas coronarias locum mereatur. Hirsuties omnium partium in planta culta quoque maior.

#### §. V.

Caeterum Digitalis purpurea non inter rarissimas numeranda est plantas; maxime amat vias, montes, valles humidas,

das, sylvas et ericeta *i*) in aggeribus, terra constantibus, ruderibus *k*), in lapidosis et arenosis (grovelly) regionibus crebro nascitur; rarissime vero et fere nunquam solo terra calcarea seu lapidibus substrato *l*).

Vt exemplis illustrem, Gesnerus eam reperit ad Coire' La Chenal ad Badenweiler et in adscensu montis Ballon. Diurnoi circa Neufchatel *m*). Inuenitur etiam in Sylua, quae dicitur *Schwarzwald*, in monte Idar, vbi carbones comburuntur, et circa officinas in quibus ferrum cuditur. *n*) in monte Infelsberg dicto ad pagum Waltershausen et apud Gifsam in monte Diesberg. *o*) ad Girarmegni, vbi fodinae argenti sunt, ad Mosmünster quoque et. S. Thamarix in Monte Rösberg, etiam in montibus circa thermas plumbarias *p*) in Christianfand et Bergenstift in Norvegen. *q*) habitat a Lesperou *r*) creberrima in campis Parisios circumiacentibus, deprehenditur. In Hercynia plurimis ac diuersis in locis, atque in syluis remotissimis eam reperit Hallerus. *s*) praeterea in Anglia quoque saepe reperitur ad vias sepimentis cinctas *t*) in Belgii locis saxosis, vmbrosis in montium conuallibus, et vbi  
ferri

*i*) Lewis materia medica 275, Dalei pharm p. 214.

*k*) Morison Flora danica l. pars I.

*l*) Lewis l. c.

*m*) Ex Halleri histor. stirp. heluet. indig. Bernae 1768. T. I. p. 143.

*n*) Tragus l. c.

*o*) Rupp. flora jenens. I. p. 767. Edit. Hall.

*p*) J. Bauhin l. c. 813.

*q*) Morison l. c.

*r*) Gouan flora monsp. 1767. p. 99.

*s*) Rupp. fl. jen. l. c.

*t*) Blackwell herb. T. 16.

ferri et Lytonthrocum fodinae vicinae sunt, sponte exit *u*). Barielleri in Gallia quoque vidit, nec non in Hispania, et in Italia *x*). Haud longe ab vrbe Göttinga nascitur, inprimis frequenter ad Visurgim circa Mündam, auersa parte eorum montium inueni, qui ab parte inferiori lapidibus inclusi sunt, proxime ad viam.

Inter omnes constat, hanc herbam duos annos durare; floret a medio Junio vsque ad extremum Julium, interdum tamen serius etiam floret, quemadmodum Joh. Bauhinus mense Octobris eam adhuc inuenit.

#### §. VI.

Digitalis, de qua ego disputo, systemate sexuali ob quatuor, quae habet stamina, quorum duo longiora duo autem breuiora sunt, Classi decimae quartae, Didynamia appellatae, et eiusdem secundo adnumeratur ordini ac diuisioni, cui nomen angiospermia est, quia semina pericarpio tecta sunt. Cuius generis essentialia characteres hi sunt: Calix quinque-partitus. Corolla campanulata, 5-fida, ventricosa, Capsula ouata, bilocularis *y*). Ill. Eques Linnaeus Digitalis speciem, purpuream dico, hoc definit modo. — "Calycinis foliolis ouatis, acutis, corollis obtusis: labio superiore integro *z*), corollae venter intus adpersus maculis ocellaribus, folia rugosa.

Caete-

*u*) Dodonaei pempt. stirpium histor. 169.

*x*) Obseruat. 187. p. 20. plant. p. Gall. et obseruat.

*y*) Linné Systema vegetabilium: Edit. XIV. curant. Ill. Equit. Murray p. 562.

*z*) L. c. I. flora danica t. 74.

Caeterum ad numerum earum pertinet plantarum, quas Eques Linn. Luridas cognominavit; et inter plantas foliataceas numeratur.

### §. VII.

Liceat mihi quaedam Synonyma ad ea, quae iam C. Bauhinus memoravit, addere. Solemne est Digitalis purpureae nomen, quod in plurimis offendimus scriptoribus v. c. Raius *a*), Rupp *b*), Vaillant *c*), Tournefort *d*), Gouan *e*), Hoffmann *f*), Zwinger *g*), Blackwell *h*), Boerhaave *i*), deinde Digitalem folio aspero-flore albo Plucknet *k*) eam appellavit. Digitalis purpurea vulgaris a Parkinson *l*) est nuncupata; purpurea et lutea a Trago *m*). Nola sylvestris ab eodem. Digitalis flore rubro ab Heistero *n*), Rivino *o*). Digitalis purpurea maior ab Valentino *p*). Digitalis foliolis calycinis ovatis acuminatis ab Hallero. Nonnulli quoque ab simili-

- a*) Hist. l. c.
- b*) Fl. ienenf. l. c.
- c*) Botanicon parienfe p. 47.
- d*) Institutiones rei herbariae p. 165.
- e*) Fl. Monsp. p. 99.
- f*) Hortus Lugd. Batav. p. 220. 1687.
- g*) Theatr. botanic. p. 853.
- h*) Herb.
- i*) Hist. plant. p. 228.
- k*) Almagest p. 131.
- l*) Theat. p. 653.
- m*) p. 700.
- n*) Index plant I. 12.
- o*) Introd. p. 91.
- p*) Virid. reformat. p. 101. tab. 58.



similitudine, quae inter ipsam et Verbascum intercedit, tantummodo Verbascum q).

Sicuti conducit multiplicia plantae cuiusdam botanica cognomina bene cognita habere, quae ipsi a diuersis tributa sunt scriptoribus, quo aptius et magis idoneum hoc aut illud ipsis visum est; sic quoque prodesse potest, nomina in aliis linguis solemnia nosse: Graeco sermone nuncupatur *Δακτυλιτις* a *δακτυλος* quod digitum designat. Italico Aralda, Gantelli. Gallico, Doigtier, Digitale, Gent de notre Dame. Anglico Fox-glove. Belgico Vingerhoedskruid. Danico *Fingerurt*, *Fingerbølle*. Rebbiøller, Robiøller, Raevebiøller, Fingerhet, Revebieldeström r) Ungarico Vyflugyzeufiu s) Vernacula Lingua *Fingerhut*, *Fingerkraut*, *Waldschelle*, *Waldglöcklein* t) *Spitzwundkraut* u) in Hercynia *Geschwulstkraut*.

De multis iconibus et quibusdam figuris aeri incis, quae partim in Fuchio, Trago, Dodonaeo partim in Gerardo, Parkinsonio, Tournefort: et pluribus aliis inueniuntur, delineationes a Regnault Besler in horto Eistettenf. et Withering impressae etiam notatu sunt dignae; et Curti flor. Londinens. egregiam figuram iconibus pictis praestitit.

## C 2

## §. VIII.

q) Ex Fuchio p. 700. Nonnulli *Σρυαλλίδα* nominant et Verbasci speciem faciunt quae *λυχνίτις* dicitur: Dod: p. 169. l. c. J. Bauh. l. c. p. 812. Sed lychnitis siue thryallis folia habet pingua, crassa et hirsuta ad Elychnia in Lucernis apta. Plinius hist. l. c. p. 570. 47. qualia minime Digitalis, cuius tam crassa aut hirsuta non sunt ut Ellychnii Vicem explere queant: Dod. l. c.

r) Morison l. c.

s) J. Bauhin l. c.

t) Tragus l. c. p. 13. l. c.

u) Simon Pauli quadripartitum botanic. p. 284.



## §. VIII.

Interdum floris variationem deprehendimus cum albo colore *x*). Inde factum est, ut a quibusdam, singularis species haberetur: sed falso: praeterea haec varietas est rarissima; nam e millibus vix unam plantam reperiens, flore albo insignem *y*) sunt plures scriptores, qui eandem tuentur sententiam. Rivinus v. c. unam eandemque esse existimat *z*). Secundum illam opinionem varietatem flore albo insignem, singularis esse speciei, existit Digitalis flore magno candido Joh. Bauhini, alba maior Valentini, Parkinsonii, alba folio aspero C. Bauhini, alba Gerardi; — Rajus loco laudato quasdam praeter eas commemorat varietates Parkinsonii *a*).

- 1) Meminit nempe alterius adhuc Digitalis albae speciei, quam digitalem albam alteram: f. minorem appellat, cui folia praecedenti quidem similia tribuit, verum minora paulo et breviora, obscurius virentia; caulem humiliores vix tripedalem. Flores minores: in reliquis conueniunt.
- 2) Digitalis maior flore carneo eiusdem Parkinsonii. a vulgari purpurea foliis paulo minoribus differt: floribus quoque minoribus, Dilutius rubentibus f. carneis.
- 3) Digitalis media flore luteo rubente eiusdem. Mediae est magnitudinis inter Digitales maximas et minores, foliis lutea

*x*) Regnault. botanique mise a la portée de tout le monde. p. 190.

*y*) Rajus l. c.

*z*) p. 19. Digitalis flore albo vel purpureo.

*a*) Editione Parkinsonii quam ad manus habui Londini 1643, impressa hae quidem species adnotatae non erant, auctor tamen ipse addidit, se antiquiori Editione eas adnotasse, quam equidem accipere nusquam potui.

luteae minoris aliquatenus aemulis, quam praecedentis minoribus, floribus longis, angustis, Digitalis albae alterius s. minoris fere magnitudine, colore aut Baetico rubore velut perfuso, quem colorem nos tawnen appellamus, et aurantiis non nullis cernitur.

Alia adhuc superest Digitalis species purpureae simillima, videlicet Digitalis thapsi *b*), cuius folia decurrentia differentiam adhibent aliquam. Quod autem ad effectus attinet, Digitalis lutea cum purpurea inter se convenire posse mihi quidem videtur. Experimenta id spectantia, quantum mihi constat, instituta in ea non sunt. Quibus differat ab ista Digitalis ambigua Linnei: siue Digit. lutea magno flore C. B. valde illi similis, abunde indicavit Ill. Eques Murray in Designat. stirp, Gotting. p. 62. cuius descriptione inductus Cl. Eques a Linné illam et iure civitatis tandem donavit, et nomen triiviale ab Ill. praecceptore primum datum recepit.

## §. IX.

### *Analysis chemica.*

Viridium foliorum XIV Vnciae expressae caerulei succi decem vncias reddebant, aliquot diebus post pars crassior imum petens, quartam aquae subfuscae superantis partem paene aequabat. Leni evaporatione inde redierunt drachm. IX. satis continentis extracti.

Viridium foliorum Vncia vna, frigidae aquae libra vna infusa, post quadraginta octo horas tenue flaescens infusum paululum acerbi saporis praestitit: Spiritus vitrioli infusioni im-

C 3

mixtus

*b*) Linné syst. vegetab. l. c. N. 3.

mixtus nullam effecit mutationem, infusum panno transmiffum et temperato calore euaporatum subfuscum, acerbiffimum faporis praebuit extractum, pondus scrupl. II. aequans. Folia quae supererant drachm. vj pondus habebant. — Infusum secundum lucidius aspectu erat, tamquam aqua in eluendis vasis adhibita, parum acerbe sapiebat et extracti gran. XXI. reddebat. folia relicta ponderis erant 3jjj gran. XXV. — Infusio tertia fere albescens esse putabatur, eique aliquantulum modo acerbi faporis inerat; extractum gr. XII efficiebat. Folia remanentia 3jj grvj ponderis habebant. — Quarta vice infusum omnino lucidum conspiciebatur, acerbum amiserat faporem, et Extracti gr. vij. praebuit. reliquiis Vnc. vj. vini Gallici infundebantur; inde infusum ipsum satis acerbum accipiens faporem, 3β Extracti reddebat, reliquiae 3jΘj ponderis erant. Secunda minus amara infusio Extracti gr. XXV. faciebat.

Foliorum recentium vna Vncia libr. vni calidae aquae immixta per quadraginta octo horas. Infusio coloris subfufci, aspectum, sicuti cereuisia tenuis, habebat, fapore prioribus acerbior erat. Spiritus vitrioli immiffus nihil attulit mutationis. Leniori euaporata calore Extractum prouenit subfuscum ponderis Scrupl. jjβ. Folia remanentia pondus 3vjβ habebant. — Secunda leuior erat infusio, minus acerbitalis habebat, et Extractum 3β gr. V. efficiebat, reliquiae aequabant 3vΘj. — Tertia vice infusioni nihil fere acerbi supererat, lurida specie et inspiffata Θj gr. IV fecit, folia remanentia 3jjjβ aequabant. Quarta vice infusa nihil faporis adferebat, infusum potius, lucidum omnino, et praestabat gr. xjj Extracti.

Spiritus vini rectificatiffimus tincturam fecit caeruleam quae inspiffata, Extracti gr. jv reddebat.

Vncia



Vncia vna recentium foliorum ℥j vini gallici per 48 horas infusa acerbam et linguam mordentem, subfuscam faciebat infusionem, eiusdem fere cum vino coloris. Spiritus vitrioli nullam adferebat mutationem. Infusum inspissatum 3jjβ fusci Extracti exhibebat, folia vero residua ponderis 3β ℥jj. Altera vice infusa minus acerbam exhibebant infusionem, cui Extractum 3j ℥ij inerat. residuum aequabat 3jjj gr. jv. — Tertia vice infusa, infusionem reddebat magis subdulcem et constringentem, quam acerbam. Extractum 3j aequale erat, folia residua ponderis erant 3jjβ. — Quarta vice infusa, badiam, minus acerbam, infusionem, reddebat, cuius Extractum ℥jj aequabat, residuum 3j ℥jj pondus habebat. — Quinta vice infusionis tinctura minus acerba, badia specie, reddebat ℥j extractum: folia residua 3j ponderis. Qui sp. vino rectificatiss. infundebantur, ex quo caerulea, aliquantulum constringens tinctura oriebatur; Extractum gr. vj ponderis erat.

Foliorum recentium, vncia vna cum ℥j Spirit. vini rectificatiss. per quadraginta octo horas infusa, pulchram caeruleam saturatam, acerbam reddebat tincturam, aqua, aliquantulum lactea reddebatur, Spiritu vitrioli, obscurior. Leniter euaporata infusio Extracti caerulei 3jβ exhibebat; residua folia 3v. ponderis erant. — Infusio altera vice instituta paulisper flauens, aliquantulum caerulea videbatur, adstringens, atque Extractum minus caeruleum ℥j ponderis praebeuit, residuum adhuc 3jjjβ pondus habebat. — Tertia vice facta ex infusione tenuem subflavescentem, parum acerbi saporis accepi tincturam, modo gr. vj Extracti. residua folia aequabant 3jjβ. — Infusio e residuo cum 3vj vini Gallici accepta adhuc ℥jj Extracti haud parum continentis praebebat.

Ex

Ex Vncia vna foliorum recentium et ℥j optimi aceti vini per quadraginta octo horas infusio acerbam ac fuscam reddebat tincturam, ex qua ʒj℥j Extr. obtinui folia residua ponderis ʒvj habebant. — Infusio secundaria aliquantum erat clarior, haud parum acerbi saporis, Extractum ʒj aequabat, residuum vero ʒβ. — Tertia infusio haud minus amaritudinis habebat, atque duos scrupl. Extracti reddebat; residuum ponderis erat ʒjjj. — Infusioni quarta vice factae parum acerbi inerat, et Extracti gr. xxj redierunt, residuum vero ponderis ʒjj℥j erat. E quinta accipiebantur infusione Extracti gr. vjj. Spiritu vini rectificatissimo, tinctura satis viridis reddebatur, quae Extracti gr. vj efficiebat.

Pulueris vncia vna, ℥j aquae frigidae per 48 horas infusa; subfuscā, turbidā, acerbā, linguam constringentem effecit tincturam, ex qua leniter instituta euaporatione ʒjβ Extracti remansit; residuum ʒvj℥β erat ponderis. — Altera vice satis adhuc acerbi saporis et obscurum accipiebatur infusum, quod ℥jj gr. xjj Extracti praebuit; pulvis residuus aequabat ʒv. — Tertium instituta infusione, aspectu badia, minus acerba, leni euaporatione Extracti gr. xxvj ponderis nanciscebar, residuum pondus ʒjv gr. xjj habebat. — Quarta vice infusio paululum acerba reddebatur, et Extracti gr. xj exhibebat. residuum vero ponderis ʒjjjβ erat. — Quo ex residuo et spiritu vini rectificatissimo ʒvj coniunctis, infusio facta fusca videbatur, et continebat gr. xvjjj Extracti, residuum ʒjj℥jj aequabat.

Pulueris Vncia vna feruida aquae per 48 horas immixta, fuscā, valde acerbā constringentem fere subdulcem reddebat infusionem, Extracti ʒjj in se continentem. reliquum



quum aequabat  $\text{zv}$ j. Infusio secundaria paulum minus clara erat, haud parum acerba, constringens, et  $\text{zj}$  gr.  $\text{xjv}$  Extracti faciebat; residuum aequale erat  $\text{z}\beta$  gr.  $\text{xxxj}$ . — Tertium infusum, lucidiorem, fuscum, minus acerbam, efficiebat infusionem, quae  $\text{vj}$  Extracti continebat; residuum aequabat  $\text{zjjj}$  — Quarta clarior minus amara infusio gr.  $\text{xxj}$  Extracti afferebat; residuum  $\text{zjjvj}$  aequabat. Quinta vice infusio Extracti g.  $\text{xj}$  exhibebat.

Pulveris vncia vna  $\text{vj}$  vini gallici per 48 horas infusa, amaram adstringentemque effecit tincturam, spiritu vitrioli aliquantulum obscuriorem, aqua vero lacteam factam atque  $\text{zjjj}$  Extracti conficiebat; residuum  $\text{z}\beta\text{vj}\beta$  erat ponderis. — Secunda rursus amara tinctura Extractum  $\text{zjjvj}\beta$  ponderis effecit; residuum  $\text{zjjj}$  aequabat. — E Tertia infusione satis adhuc amara  $\text{zj}$  gr.  $\text{xjv}$  reddebantur Extracti, reliquum  $\text{zjj}$  erat aequale. — E quarta  $\text{vj}$  accipiebam Extracti; residuum  $\text{zj}\beta$  aequabat. — Quinta ipsa infusio parum amari adhuc habebat, ac gr.  $\text{xxjj}$  aequabat Extract. residuum  $\text{zj}$  gr.  $\text{xjv}$  ponderis erat. — Sexta gr.  $\text{xj}$  Extracti reddebat. — Spiritus vini rectificatissimus tincturam adhuc viridem dedit, quae Extracti gr.  $\text{vj}$  reddebat.

Pulveris Vncia vna,  $\text{vj}$  spirit. vini rectificatiss. 48 horas infusa, pulchram ac satis viridem efficiebat tincturam, quae ob eminentem spirit. vini acrimoniam haud satis amara esse videbatur; aqua immixta lactea, spiritu vitrioli obscurior reddebatur. Extracti viscidum ac subviridis  $\text{zjvj}$  emittebat; residuum  $\text{zv}\beta$  erat ponderis. — Secunda infusio adspectu lucidior viridis erat. Extractum  $\text{vj}$  pondus habebat, residuum  $\text{zv}$ j. — Tinctura e tertia infusione accepta priori fere similis erat colore

D

et

et  $\text{Θj}$  grjjj praebebat Extracti; residuum  $\text{zv}$  gr xvj ponderis erat. — Quarta vice infusio lucidior erat, et Extracti gr. xv referebat; residuum pondus  $\text{zv}$  habebat. — Quo ex residuo et  $\text{zv}$  vini Gallici, coniunctis infusio facta, vini servavit colorem, satis acerbe sapiebat, Extractumque  $\text{zj}$  gr. vjjj exhibebat; residuum pondus  $\text{zjjjΘj}$  habebat. Altera vice vinosa infusio facta haud parum amaritudinis habebat, et Extractum inde acceptum ponderis  $\text{Θjβ}$  erat.

Pulveris Vncia vna,  $\text{℥j}$  aceti vini infusa, badiam ac acerbam reddebat tincturam. Extractum  $\text{zjjΘj}$  accipiebatur; residuum aequale erat  $\text{zvβ}$ , altera eundem cum priori habebat colorem, minus amara erat; Extractum reddebat  $\text{zj}$  gr. xxvj; residuum  $\text{zβ}$  et grana aliqua ponderis erat. — Tertia clarior parum acerbata tinctura  $\text{zj}$  Extracti adferebat, residuum  $\text{zjjj}$  ponderis. — Quarta tinctura subflava adhuc satis erat amara et Extracti reddebat  $\text{Θjj}$ ; residuum  $\text{zjjΘβ}$  ponderis habebat. — Quinta minus amara Extracti  $\text{Θjβ}$  praebeuit; residuum aequabat  $\text{zj}$  gr. xxjv. Sexta nihil fere amari habens, Extractum gr. xvj, et residuum  $\text{zj}$  gr. v ponderis reddebat.

Siccatae radicis Vncia vna,  $\text{℥j}$  frigidae aquae 48 horas infusa, fuscam fere haud amaram aliquantum vero acerbam infusionem,  $\text{zj}$  Extracti praebentem; residuum  $\text{zv}$  gr xvjjj aequabat. — Secunda clarior erat, et Extractum  $\text{Θjj}$  ponderis reddebat; residuum pondus  $\text{zvΘjj}$  habebat. — E tertia et quidem lucida infusione Extractum redditum aequabat  $\text{Θβ}$ ; residuum  $\text{zvΘj}$  erat ponderis. — Quarta autem infusio Extracti gr. vj praebebat.

Radicis Vncia vna  $\text{℥j}$  feruidae aquae infusa, fuscam haud multum amari saporis infusionem, subdulcem in ore relinquentem saporem reddebat. Extractum  $\text{Θjβ}$  pondus habebat, residuum

duum  $\text{zv}\text{ij}\text{ij}$  ponderis erat. — Secunda pallida erat infusio parum amara et Extracti gr.  $\text{xxxx}\text{ijv}$  reddebat; residuum  $\text{zv}$  gr.  $\text{xx}\text{ij}$  erat aequale. — Tertia quidem tenuis infusio gr.  $\text{xv}\text{ij}\text{ij}$  Extracti efficiebat; residuum  $\text{z}\beta\text{ij}\text{ij}\beta$  aequabat. — Quarta lucida infusio modo gr.  $\text{jx}$  Extracti praebebat; residuum  $\text{z}\beta$  erat ponderis.

Vncia radicis vna  $\text{f}\text{ij}$  Vini Gallici infusa amaram nec non fuscā reddebat tincturam, inde Extractum  $\text{z}\text{ij}\text{ij}$  erat ponderis; residuum  $\text{zv}$  gr.  $\text{xx}\text{ij}$  aequabat. — Secunda haud minus amara, sed clarior tinctura  $\text{z}\text{ij}\text{ij}$  Extracti reddebat; residuum  $\text{z}\text{ij}\text{ij}\beta$  ponderis erat. — Tertia tinctura lucida, minus amara Extracti  $\text{ij}\text{ij}\beta$  praebebat; residuum  $\text{z}\text{ij}$  gr.  $\text{x}\text{ij}$  pondus habebat. — Quarta infusio aliquantulum amara Extracti gr.  $\text{x}\text{jx}$  adferebat. Spiritu vini rectificatissimo tinctura paululum viridis reddebatur, quae Extracti gr.  $\text{ij}\text{ij}$  efficiebat.

Radicis Vncia vna,  $\text{f}\text{ij}$  spirit. vini rectificatiss. infusa, tantum viridi-flaudentem tincturam  $\text{ij}\text{ij}\beta$  Extracti reddentem; residuum  $\text{zv}\text{ij}$  erat ponderis. — Secunda infusio clara quidem, magis autem flauens, parum amara  $\text{ij}$  gr.  $\text{iv}$  Extract. reddebat. — Tertia plane lucida visu erat, et gr.  $\text{x}\text{ij}$  Extracti habebat; residuum  $\text{zv}\text{j}$  ponderis erat. — Quarta modo gr.  $\text{iv}$  Extracti efficiebat.

Radicis vncia vna,  $\text{f}\text{ij}$  aceti vini infusa, non minus amarā et rufā reddebat tincturam  $\text{z}\text{ij}\text{ij}\beta$  Extracti praebentem. residuum  $\text{zv}\text{ij}$  ponderis erat. — Secunda infusio minus acerbi erat. saporis et Extracti  $\text{ij}\text{iv}$  habebat. residuum  $\text{z}\beta$  erat aequale. — Tertia clarior, minus amara tinctura  $\text{z}\text{j}$  Extracti reddebat. residuum  $\text{z}\text{ij}\text{ij}\text{ij}\beta$  erat ponderis. — E quarta in-



fusione gr. xxvjjj accipiebam Extracti; residuum vero pondus 3jjθj habebat. — Quinta infusio parum adhuc amari habebat, et gr. jx aequabat Extractum.

Casu quodam mihi in destillatione occupato, accidit vt, omnia accurate et distincte obseruandi mihi eriperetur facultas. Nihil igitur de hac commemorabo. — Si quis fortasse plura ad haec pertinentia perlegere cupiat, adeat Geoffroi p. 403. vbi quoque et apud Lemery sal essentielle e foliis acceptum memoratum inueniet.

### §. X.

#### *Experimenta ad Digitalis efficaciam pertinentia, et in animalibus brutis facta.*

Alacri cuidam cani sex fere menses nato a Nonis Junii cibaria duo cochlearia, quae ex 3j pulueris illius et 3vijj aquae composita infusione implebantur, quotidie instillabam. Duobus diebus interiectis, pristina eum non deseruit alacritas, mihi que cibum ei subpeditanti, et medicamenta danti, semper, vt solebat ad blandiebatur. Biduo post valde erat inquietus, vlulabat itentidem, e laqueo, quo erat ligatus, sese eximebat. Quatriduo praeterlapso, semper erat tristis, omni fere cibo se abstinebat. Faeces fusci, interdum flauo rubro commixti coloris erant, semper quoque aliquantulum fluentes.

Die nono crebris adficiebatur conuulsionibus, nihil iam commedebat frequenterque vomitabat. Faeces erant fluidae, flavae rubescentes; die decimo continuabantur conuulsiones, his intermittentibus, quietus iacebat, extremaque cubiculi in parte sese occultabat. Si ambulare conaretur, modo huc modo  
illuc



illuc vacillabat. Languiebant arteriae ictus, pulsus vix vicefies quater in temporis minuta repetebatur. Minuebantur tamen convulsiones, plane quiescebat, nihil iam audire videbatur, eoque ipso die mortuus est. Corpus eius ad intima vsque exesum erat ossa. A septimo inde die vsque ad extremum tempus paene contracta erant membra, capillique perplexi horrebant. Duobus nouissimis diebus prorsus fluidae erant faeces, coloris flauī, cum rubris mixti lineis. — Pulmones infectione facta inueni integros, dextro tamen excepto, qui paululum rugosus videbatur. Cor naturale erat, camerae eius sanguine concreto erant refertae. Vesica fellea plena erat lurido felle, renes erant salui, stomachus omnino vacuus pituita obductus prasina, intestina tenuia quidem viridibus impleta erant sordibus, crassiora vero, multa tantum pituita prasina, vesica urinaria mirum in modum contracta, materiae solidae similis esse videbatur.

Alteri cani, qui illum annis quidem fere aequabat naturae viribus autem superabat, solutionem aquosam ex aquosae foliorum infusionis extractu consistentem praeparavi, cuius solutionis duo cochlearia minuta impleta singulis diebus accipiebat, ita vt in vna quaque dosi, gr. jv containerentur. Quamuis per viginti quatuor dies illa sumfisset, insignis tamen animaduerti non potuit mutatio. Cibi insatiabilem fere habuit cupiditatem, faeces naturaliter erant tinctae, paululum modo fluidiores, quam alioquin inueniuntur. Intra quatuor dierum spatium tristior esse videbatur. Cum igitur hanc dosin exiguae in eum esse efficaciae animaduernerem, per duodecim dies scrupuli dimidium singulatim ei dabam; intra hoc temporis intervallum tristior ille reddebatur, minus cibi, quam antea, sumebat, et plerumque in cubiculi remoto angulo iacebat; fae-

ces satis fluidae erant, interdum subfuscae, saepissime vero coloris cineracei. Nunc quotidie grana  $\text{jj}$  dosi addebam quae igitur e  $\text{xij}$  granis constabat, prioribus quatuor diebus omnia, ut supra sese habebant sequentibus autem sex diebus mirum in modum attenuabatur; cibi habebat valde exiguam cupiditatem, faeces liuidae, subrubescens immixtae erant lineis, quiete ipse se gerebat; tristis videbatur et cubiculum intrantem oblique adspiciebat; posterioribus quinque diebus, crebro sub fuscam foetentem euomebat materiam fere fluentem. Faeces mucosae priorem habebant colorem. Caeterum artus ipse non mouebat, os ita spumabat, ut canis, si e vultu tantum coniicerem externo, rabiosi. biduo postea, quinquagesimo tertio die, ex quo Extracti solutionem sumere inceperat, morte, haud vehementioribus illam comitantibus conuulsionibus, opprimebatur. Cum eum incidissem, pulmones satis rugosos deprehendi, cordis sinus et ventriculos sanguine coagulato impletos, vesicam felleam multa et furua bile refertam, renes durissimos, ventriculum inanem, liuida obductum pituita, intestina tenuia cinerariam variis in locis flauam subfusco mixtam colore in se continebant materiem. Crassiora autem intestina erant inania, flauescenti pituita obducta.

Catulo quatuor circiter menses nato, iam satis macilento corpore per quatuor dies quotidie tres uncias aquae, e Digitalis purpureae foliis destillatae, dabam, at prorsus nullum animadvertēbam effectum. Tribus autem sequentibus diebus singulis, is quinque sumebat uncias, sed neque haec dosi nullos perspicuos adferebat effectus. Per biduum cibus satis pasto, quotidie gr.  $\text{jj}$  Extracti e succo foliorum expresso dabam; quod per nouem dies ille quidem sumebat, sed nullas notatu dignas animaduertere potui mutationes, quibus fortasse esset adfectus.

Verum

Verum tamen magis magisque macrescere videbatur, timidior factus, cibum vero adpositum satis auide deuorabat, faeces naturali tinctae erant, sed paululum lucidiores ac fluidiores. Dosis illi dandam equidem augebam et septem grana ei quotidie dabam. Biduo praeterlapso, huius dosi efficacia in eo haud parum apparebat; magis magisque conficiebatur, tristior reddebatur, minus cibi, quam antea comedebat. Sequentibus tribus diebus tantum in modum viribus attenuabatur, vt nihil amplius, nisi ossa et cutis superessent; fere nihil ciborum sumebat, faeces fuscae paene nigricantes et paulum fluentes exigua quantitate emittebantur; incessurus titubabat. Pulsus paruus, languescens, duobus extremis diebus sexagies in minuta. Die sequenti, qui erat decimus quintus, ex quo extractum sumserat, quietus iacebat, interdum quidem sed rarissime exiguis adfligebatur conuulsionibus, eodemque moriebatur die. — In sectione pulmones paululum corrugatosprehendi, cor sanguine coagulato refertum, ventriculus nigricanti simulque caerulea viscida, parum fluenti materie plenum, in tenuioribus inueni intestinis stupae quaedam frusta, ab ipso antea deuorata cane, fusca obducta colluie, quae foedum vti prillina, reddebant odorem, et instrumenta chalybe fabricata laedebat: crassioribus inerat intestinis modo descriptae similis colluies; renes durissimi erant, vesica vrinaria mirum in modum constricta.

In bene pasta ac saginata gallina in maximas sui generis omni iure recensenda pulueris recentis efficaciam experiundi, periculum faciebam; cibo enim qui erat panis in frusta secatus et humidus redditus inmiscebam. Initio quotidie gr. jx eiusdem pulueris tantum, quam dosin per quinque dies sine villo damno inde ipsi excitato sumebat. Pulueris portionem  
indies



indies augebam et intra septemdecim dierum spatium pulueris tres vncias sumferat. Interea trepidatio atque inquietudo eius leniebatur, mitis aut potius tristis facta esse videbatur, cum antea vehementer esset fera et custodiam effugere conaretur. Interdum cibi ei erat fastidium; siti laborabat ingenti; excrementa erant subfusca et vilitato fluidiora. Inde a die vicesimo secundo, ex quo experimenti initium ceperam, ad tricesimum secundum usque pulueris 3jjj quotidie immiscebam cibo. Hanc portionem semper illa sumens in eadem permansit conditione, quam antea descripsi. Dimidium igitur vnciae pabulo quotidie admiscebam quod per duos tantum deuorabat dies, postea vero modo plane nihil huius mixti nutrimenti attingebat, modo rursus comedebat. Sic res se habebat usque ad diem quadragimum sextum, quo temporis omni intervallo ad summum duodecim sumferat vncias, et nihilo minus incolumis esse putabatur. Tristitia eius continuabatur, in cubilis angulo quietus sedebat, capite pennae inuoluto, quorum tamen magnam amiserat copiam, ampli enim cubiculi solum, in quo inclusa erat, pennis omnino erat obductum.

#### §. XI.

##### *Digitalis purpureae Proprietates Vires et Effectus.*

Quod si Digitalis naturalem cum reliquis generibus v. c. Atropa Hyoscyamo, Datura, Nicotiana et pluribus aliis intercedentem spectemus affinitatem, ac si modo enarrata experimenta in brutis instituta bestiis perpendamus et exinde ratiocinemur, efficacissimas in ea latere partes, iure colligere debemus, quae coniecturae aliorum eorumque doctissimorum medicorum experientia, maiorem atque indubitatam sibi conciliarunt auctoritatem. Omnes enim, qui de huius plantae natura  
atque



atque indole quaedam conscripserunt, et quos euoluere mihi licuit, inter se consentiunt eam feruenti et arida esse natura, eiusque efficaciam esse eam vt nauseam, vomitum *c)* purgationesque excitet *d)*, quod de foliis praecipue valet. Cl. Withering *e)* dosibus magnis et repente repetitis, oculorum caliginem, visus obscuritatem, colorum in rebus obiectis permixtionem ortam esse animaduertit, res, quibuscum aegroti essent circumdati, ipsis virides aut flauas visas, vrinae secretionem esse auctam, interdum quoque interruptam, aegrotos eam continere non potuisse, arteriae ictus compressos, ita vt vix triginta quinque in temporis minuto ictus numeratur, sudores frigidos oriri, conuulsiones, mortiferum virium deliquium *f)*, et ipsam mortem excitari; interdum saluatio sequebatur. Ipse Vir praeclarus Withering valde haesitat, num talis eam semper comitetur effectus, sed interdum certe id accidere ipse experientia edoctus, confirmare possum, cum hic mihi contigerit casus: cum enim quorundam infusorum ex ipsa, de qua nobis nunc sermo est, planta factorum euaporatione occupatus, per integros plures dies continuus in eodem habitaculo commorari,

*c)* Dod. pempt. l. c. Rajus 767. Lobel stirp. obseruat. 308. Daleus 212. Spielmann 99. Boerhaave 308. Buchwald 102. Techneyherbal 105. Gouen 99. practical Essays on medical subjects p. 41. vid. *Abhandlungen für practische Aerzte* 1 B. 2 St. p. 112.

*d)* Praeter eos modo citat. vide adhuc *Lentins Beobachtungen* 165. Camerarius hort. botan. 55. pract. Essays l. c. *Richters Bibliothek* 5 B. *Beyträge* 532. a Cl. Confil. aulico Mayer.

*e)* An Account of the Fox glove and some of its medical uses, with practical remarks on dropsy etc. 1785. Birmingham p. 184.

*f)* Richteri Biblioth. l. c.

*g)* Pract. Ess. l. c. ex Murray 490. T.I. m. med.

rari, ob laboratorii ad eiusmodi labores rite instructi inopiam, coactus essem, per aliquot dies capitis doloribus sum adstrictus, satis frequens mihi oriebatur confluxus salivae, perdulcis faporis, quae valetudo infirmior in quoddam temporis spatium a laboribus desistere me coegit, aeris vero liberioris puriorisque usus pristinae me restituit sanitati.

Dodonaeus auctor est, quosdam homines, placentam ex huius plantae et aliarum foliis praeparatam, edentes, postea pessime sese habuisse atque in vomitum incidisse. Sic Lobelius narrat, Sommerseti Angliae rusticam turbam huius decocto febricitantibus purgationes et interdum superpurgationes et vomitiones humidioribus aluo moliri. Raius loco iam laudato observationem hanc addidit: medicamentum hoc robustioribus tantum convenire, siquidem violenter admodum purgat et vomitiones immanes excitat. — Infantes eius fructus edentes incidunt in vomitum et dysenterias vix curabiles *h*). Sic igitur folia exulcerant os, fauces, oesophagum et ventriculum *i*). Vomitus atque alui laxatio ex succi cochleari vno in pinta dimidia cerevisiae calidae sumti *k*), idem etiam accidit ex decocti cochlearibus sex-septem *l*). Alii duo aegrotantes praeter illas modo dictas euacuationes quibusdam cyathis potis ingenti adficiebantur angore, doloribus, cardialgia, singultu et manuum pedumque frigore *m*). Puella octennis eadem de causa

*h*) Boerhaave hist. 308.

*i*) Boerh. l. c. Pract. Ess. l. c. ex Ill. Murray l. c.

*k*) Pract. Ess. l. c. ex Ill. Murray l. c.

*l*) On aerial influences 49. 50. ex Hallero hist. stirpium heluet. indigen. 143.

*m*) *Lentins Beobachtungen einiger Krankheiten* 165. ex Ill. Murray l. c.

causa periit. Meleagrides post inebriationem, conuulsiones, deiectiones cruentas et emaciationem necat *n*).

Sunt igitur permulti, qui hanc plantam suspectam *o*) venenoque infectam esse autument *p*). Nonnulli hac suspitione adducti longe abfuerunt, vt eius internum in medicina commendarent vsum; inde etiam Simon Pauli loco citato: velim, inquit, internum vsum illius vitare chirurgos. Sed quamuis, quod ad medicinalem eius pertinet vsum, doctissimorum hominum sententiae inter se sint diuersissimae et maxime discrepantes; et quamuis suspecta ac venenata a non nullis existimetur, haec ipsa res argumento esse potest efficacissimas vires in ea latere; libenter quidem concedo, in eius medicinali vfu maximam esse adhibendam cautionem. Si itaque caute et circumspecte et iustis limitibus adhibeatur, de salubribus et sanitati maxime conuenientibus viribus nullo dubitari potest modo: nam recentissimis satis et abundanter comprobatum et euictum est experimentis. Constat quoque inter omnes, quamuis medicinam, etiamsi innocentissima esse non modo putetur, sed etiam re vera sit, immodica dosi aegrotis datam, maximam adferre posse noxam; eadem ratione remedium veneno maxime infectum artis medicae perito medico moderante, saluberrimam euasuram medicinam. Iam antiquiorum quidam auctorum, qui Digitalis mentionem fecit, cuius vero nomen mente mihi excidit, maxime efficaces et patentes ei subesse vires, confirmat. Et Alston *q*) eam in earum indigenarum

E 2

planta-

*n*) Salerne in hist. de l'acad. d. scienc. 1748. p. 84. ex Murray vide etiam Withering.

*o*) Haller hist. stp. 143.

*p*) Boerhaave l. c. vide etiam Fritze Med. Annalen. 331. I Thl.

*q*) Index medicament. simplic. praefat. p. 5. ex Withering introd. vide etiam Lewis mat. med. 276.



plantarum recenset numerum, quae hoc quidem tempore non aestimentur pro suo pretio, quibus tamen potentes insint vires, vix vlli Indiae plantae cedentes,

## §. XII.

Quod autem ad proprias Digitalis attinet medendi Vires, magis externe quam interne est adhibita, inprimis vsus illius externus ad scrophulosa symptomata pertinuit, v. c. aduersus strumas (kings evil) eius efficaciam tentarunt medici, dum contusa herba, seu potius succus eius in vnguentum conuersus, affectae imponebatur parti *r*), et noui plures, inquit Rarius *s*), qui in strumosis tumoribus Digitalis floribus valde confidunt, quos quidam in butyro maiali, quot possunt immittentes, curant insolandos per aestatem. Alii cum adipe suillo miscent et sub terra defodiunt per quadraginta dies: vtrique flores cum vnguento reseruant, vna cum linteis inducunt et tumoribus applicant. Hisce tumoribus discutiendis vel maturandis vlceribus detergendis vel explendis sufficere ferunt, se expertos. Quinto et sexto quoque die Diacarthamo purgant, interim continue herbae Robertianae decoctum praebent. Pars vlceris rubens parte vnguenti tenuiori illinatur. Pars autem crassior vnguenti linteamini imponatur, quod numquam mutetur. Sunt, qui nouella et primo erumpentia plantae germina accipiunt, eorumque Succum expressum in butyro coquunt ad succi consumptionem, atque nouo succo addito bis terue repetunt." Monita quoque haec adiunxit ex relatione D. Hulse.

Paretur enim oportet sufficiens quantitas vnguenti eo anni tempore quo flores haberi possunt, cum nonnunquam integer  
annus

*r*) Parkinson Th. p. 654. ex Wither. introd. p. XVIII.

*s*) Hist. vniuersal. 767.



annus aut amplius ad curam perficiendam requiratur. Quamvis vlcera primo maiora fiant, ne metuas; siquidem vnguentum postquam humores omnes absumpserit et exsiccauerit, ea demum sanabit et cute obducet.

Vnguentum hoc in scrophulis humidis et puro manantibus vtile est, in siccis parum valet: sed ad Basilicum et praecipitatum confugiendum est."

Nosocomii Worcesteriensis tum medici tum Chirurgi, pluribus contestantur exemplis eximiam et salutarem efficaciam vnguentorum atque cataplasmatum e foliis paratorum *t*) quae alio quoque loco etiam atque etiam praedicantur *u*) ob usum inprimis ad vlcera nimis laxa adhibitum, vbi optatissimum successum ac miratione dignum praestitit effectum. Atque in Pharmacopoeia Wirtenberg. *x*) idem optatissimum huic fini vnguentum commendatum ac praescriptum leges. Et Zeiher *y*) florum butyro coctorum aduersus glandulas tumescentes salutarem vim maximis effert laudibus.

### §. XIII.

Pari quoque ratione ad hereditario acceptas modo scrophulas sanandas Digitalis tamquam praestantissimum remedium a plurimis est probata *z*). B. Haller loco infra laudato narrat

E 3

casu

*t*) Pract. Ess. 44. ex Murray I. c. 492. vide etiam *Abhandlungen für pract. Aerzte* I B. 2 Stück p. 114.

*u*) Chirurgie pharm. 101. Buchwald. ex Halleri hist. ft. 143.

*x*) P. 243.

*y*) Vicat mat. medica 99.

*z*) Aereal infl. 49 - 50, vid. Haller. hist. ft. ex Murray 491. I. c.

casu quodam desperato tam diu decoctum esse adhibitum, donec cutis deuolueretur. Illustr. Eq. Murray, praeceptor mihi venerandus, permulta praeter haec in eximia materia medica commemorat scriptorum excerpta ad scrophulas hereditarias pertinentia, quorum summa haec est. “Conualuit quoque Vir *a)* variis corporis locis scrophulosis vlceribus tentatus, in crure dextro tam diris, vt de amputatione iam cogitaretur, succi cochleari vno bis intra quatuordecim dies cum dimidia pinta cereuisiae calidae inter dira symptomata capto, et applicata quotidie herba post expressionem residua *b)*. Multum leuaminis cochlear vnum succi, descripto modo assumti, feminae iuniori conciliauit, scrophuloso tumore oculi, fissuris labii superioris insigniter tumidi, tumoribus articulorum in digitis et continuo fere artuum dolore afflictæ; sed ob nimiam remedii vehementiam continuationem eius necessariam detraxit *c)*. Constantior fuit Vir, scrophuloso tumore eoque lurido cubiti dextri per triennium sub dirissimis doloribus laborans, sed quatuor praebitis succi per intervalla vnus mensis integre fere sanatus *d)*.” Helmontius aduersus scrophulas radicem Digitalis in puluerem contritam interne maxime commendat *e)*; idem remedium laudat Burmannus. — Anno proxime elapso Cl. Quarin etiam in Nosocomio, succum Digitalis purpureae recte expressum, atque externe applicatum, et extractum interne

*a)* Ille iuuenis octodecim annos natus, per decennium alia frustra adhibuerat medicamina; frequens erat et puriformis e vulneribus apertis efluxus, ita vt febris hectica timenda esset.

*b)* Practical Ess. 40.

*c)* L. c. 42.

*d)* L. c. 43.

*e)* Ex Quarin. animaduersiones practicae in diuersos morbos. Viennae 1786. p. 117.

terne praebitum, magno cum successu in scrophulosis tumoribus adhibuit, cum alia remedia nullo fructu antea adhibita essent; a gr. j extract. incipit, deinde saepissime ad gr. xjj progredit f).

In Nosocomio Goettingensi, vbi sub auspiciis Cl. Professoris Stromayer mihi semper colendi, Medicinae studio operam dantibus aegrotorum cura ac medela nunc mandatur, cognoui Digitalem in duobus diuersis aegrotantibus scrophulosis afflictis symptomatibus optimo cum successu esse vsurpatam.

Puella quaedam caeterum robusta ac viuida, cui nomen Annae Franz erat, tredecim annos nata quae antea, vt profitebatur, prospera semper gauisa erat valetudine, decimo aetatis anno sine caussis, ipsi notis, praecedentibus mobiles ac doloris expertes glandularum maxillae inferioris indurationes est passa; sinistra tum valde tumescebat bucca, vt haec praestantis formae puella plane deformis videretur. Chirurgus, cuius curae experientiaeque ea primum sese commiserat, malum e dente carie afflicto ortum cepisse existimabat, et hac opinione adductus, dentem maxillarem inferiorem in sinistro latere extraxit. Qua autem operatione longe abfuit, vt malum diminueretur aut cederet, vt potius in dies id augeretur ita, vt, quo dens inhaeserat, loco, carnis massa oblonga, nullos tamen dolores secum portans, e gena cresceret. Hoc experimento votis ac expectationi neutiquam respondente, plura alia ad malum extinguendum tentauit remedia, sed frustra. In Nosocomium itaque se contulit. Causae primariae, vt iam supra monui, elici non potuerunt, nisi quod capitis tinea, qua ante aliquot afflicta fuerat annos, attentos nos redderet. Contra eam adhibebantur remedia, inter reliqua vnguentum Jasseri infrigebatur, sed  
nos



nos quoque optati successus spe excidimus; nihil autem amplius nunc restabat nisi ut, ob suspicionem status scrophulosi, initio statim occurrentem, remedia huic statui accommodatissima, adhiberentur. In hunc finem Digitalis purpureae tinctura illi est praescripta, cuius quindecim guttas quater singulis diebus sumsit, ita ut, una quaevis dosi gr. vnum Digitalis contineret: nam interiectis aliquot hebdomadibus, in quibus Digitali utebatur, res magna ex parte in melius est conuersa; durati illi nodi resoluebantur, tumor diminuebatur, et ante quasdam hebdomades, sanitate ex integro fere recuperata, Nosocomium reliquit.

In alio aegrotante Digitalis adhibita salutares etiam exhibuit vires: Iustus Arend puer duodecim annorum, qui imbecilla quidem corporis fuit constitutione, optima tamen valetudine usus erat. Is ante certum temporis spatium magnum ossum cubiti sinistri tumorem, cum rigiditate artuum coniunctum sensit, inde factum est, ut nullo modo brachium inclinare posset, idque in eundem statum extensum semper habere esset coactus. Huius symptomatis una ac sola causa, quam ei inesse certo statuere potuimus, corporis scrophulosae insedit conditioni; Digitalis tincturam dosi supra determinata illi dandam curauimus; vix per quatuordecim dies, Digitali adhibita, tumor ita, ut quisque facile posset cognoscere, est diminutus, et aliqua brachii mouendi redit facultas: externe Emplastrum mercuriale brachio est impositum: indies melior eius erat sanitas, et quamquam nunc, dum malum, quo affligtus erat, describo, sanitati integrae nondum est restitutus, maxima tamen spes adest fore, ut breui tempore mobilitatem agilitatemque brachii pristinam recuperet, et os, naturalem recipiat crassitudinem.



## §. XIV.

In scirrhis quoque indurationibus succus expressus optatos praebuit effectus *g*), mulieri cuidam ambas scirrhisas habenti mammas, Digitalis herbae succi dabatur cochlear vnum, quod vehementem excitabat vomitum fuscae et viscidae materiei, qui interdum quidem per viginti quatuor continuabatur horas, interuallis quinque aut sex horarum quietis. Altera quidem mamma omni induratione est liberata, alterius autem induratio minuta ac mobilis reddita.

Mulier triginta quatuor annorum, ante biennium praeterlapsum passim in mammis atque in collo scirrhisos acceperat nodos ac praecipue duram et tumidam glandulam saliualem; dum succi ex herba cum floribus et radice expressi aquae mensura diluti cochlear vnum plenum matutino paulatim sumsit tempore, sanitati est restituta. Medicamine sumpto, nausea, vomitus pituitosus, virium defectus, et diarrhoea coloris cineracei, qualis in ictero laborantibus accidere solet. Postero die cochlearis cibarii quarta tantum pars succo impleta, et aegrotae data, effecit, ut decies aluum leuaret aegra, vix autem semel vomeret. Post octodecim dierum huius medicaminis usum, alui deiectio naturae magis conueniens est reddita, ac nodi et scirrhisae euanuerunt indurationes *h*). Ictერი notatu dignum, morbi leuamen senserunt, cum succi ex vncia vna sex vnciis aquae distillatae pulsatill. nigri: et aliquantulum syrupi immixta, singulis binis horis duo cochlearia plena aegroti darentur *i*).

Nec

*g*) Richter Biblioth. 4 Th. p. 591.

*h*) Ibid. 5 Th. p. 541 - 33. Mayer.

*i*) L. c.

Nec non in Epilepticis Digitalis est commendata et feliciter adhibita symptomatibus. Quod Parkinsonius, ut probet, narrat *k)* hominem quendam, qui per viginti sex annos singulis fere septimanis vnum, et quoque mense duos aut tres habuerit accessiones, decocti ex illius foliorum manipulis duobus et quatuor unciiis contusi Polypodii quercini, cereuisia praeparati usu ita restitutum esse sanitati ut in sedecim mensium interuallo, ne vnum quidem Epilepsiae paroxysmum senserit. Foliorum manipulum vini et aquae, aequalibus dosibus coctum, purgando Epilepsiae ferunt esse medicamen *l)*. Witheringius quoque in illo morbo vim suam salutarem hoc remedium exhibere contendit; tunc vero, cum morbi causa primaria in aquosorum humorum effusione latet, sed in symptomatibus ab eo nominatis *m)* hydropici non definiti nec constituti erant casus: neque illi talis in praxi sua medica occurrit casus, quo certo potuisset constituere, qualis efficaciae in aliis Epilepsiae generibus hoc medicamen esset.

Angli Digitalis usum in Podagra quoque et Rhachitide laudibus efferunt *n)*, cum vel folia contrita, vel unguentum, e floribus paratum, aegris corporis partibus imponunt. Huius decocto lepra etiam scorbutica esse sanata dicitur *o)* D. Bayers non frustra contra cariem et pertinacia crurum ulcera adhibuisse.

*k)* Theat: of plants. 654. ex Murray vid. etiam Withering introductio p. XVIII. et Lewis mat. med. 276.

*l)* Zwinger l. c. 833.

*m)* Vide histor. morbi 57. Epilepsia hydrope coniuncta. Sanata est. — et histor. morb. 99. in Iuvene decem annos nato nihil medicamen illud profecit.

*n)* Haller l. c. Vogel mat. med. p. 128. A. 1774. de utroque dubitat Quincy English Dispensatory. Lond. 1733. 127. Vicat mat. med. 99.

*o)* Vicat mat. med. l. c.

hibuisse eam fertur *p*), et vt breui dicam, Digitalis vsus ad varii diuersique generis vulnera sananda maxime est commendatus *q*) et Fuchsius inquit Digitales puluerisatas et vulneribus insperfas eorum iuuare sanationem *r*); herba quoque vino decocta, vulnera magna cum vtilitate sunt eluta. Inde vetus apud Italos vsitatum, ortum est adagium, "Aralda chi tutte piaghe salda", hoc est Digitalis quae omnia vulnera sanat. Foliis melle immixtis et illitis faciei et corporis maculas abigit Fuchsius confirmat loco laudato. Decocta ad bibendum data, fluxum sanguinis menstrui suppressum restituerunt in integrum, hepatis et lienis obstructions dissolunt *s*).

Nonnulli etiam in Dispnoea pituitosa eius medicinales extollunt vires. Fuchsius addit, eam, ratione modo descripta, datam, humores dissoluere crassiores et discutere, pectus abstergere atque sputum promouere. Eadem Tragus quoque adfirmat *t*), et Gerard *u*) inter alia dicit, Digitalem, melle aut sacchari aqua coctam, pectus purgare ac liberare, quippe quae crassam et viscidam pituitam ad eliciendum reddat promptam. Parkinsonius eadem sic se habere contendit, dicens: si vllum adhibendum sit medicamen ad crassam pituitam, aut lentos pectus obsidentes humores attenuandos, decoctum illud, aut succus melle aut saccharo praeparatus, huic fini est accom-

F 2

moda-

*p*) Withering introductio p. 18.

*q*) Lobel aduersaria 245. ex With. l. c.

*r*) Cap. 345.

*s*) Gerard l. c.

*t*) Simplicia valde amara, expurgant, detergunt et aperiunt vasa, crassos lentosque discutiunt humores, et electionem puris e pectore et pulmonibus adiuuant. Galenus L. 4. simpl. c. 17.

*u*) L. c.



modatissimus, et emeticis et purgantibus crassam et tenacem pituitam e corpore expellere. Vulgus Angliae occidentalis in phthisi pulmonali saepius Digitali uti dicitur *x*). Cl. Witheringius efficaciae eius in similibus casibus periculum fecit *y*), sed parum utilitatis ipsi attulit: nihilominus tamen optat, ut plures in talibus symptomatibus illius vires tentent et certi aliquid constituent. Nam in Parkinsonii herbarii quodam manuscripto, sub Digitalis articulo hanc inuenit observationem, quam, ut ipse suspicabatur, D. Saunders fortasse adiecisset: phthisi scilicet laborantes et confectos, tenui, ex aquae, aut aequalibus aquae et vini partibus et Digitalis foliis praeparato decocto, posse sanari, si aegrotus eo tamquam communi uteretur potu; eandem et salutarem vim ferunt succum percolatum; et melle tenuem syrupum factum exhibere; cuius tria cibaria cochlearia referta quotidie temporibus solemnibus essent sumenda. Hoc modo herbae ac foliorum usus interdum miros dicitur procreasse effectus: maximam vero cautionem esse adhibendam, quod facile excitaret vomitum.

#### §. XV.

Hi igitur modo commemorati sunt effectus, aut satis noti, atque vulgares, aut minus, plantae, ab antiquioribus quidem laudatae auctoribus, et in morbis a me paulo ante recensitis vires efficaces exferentis. Quoniam tamen illa ipsa a quibusdam suspecta habebatur planta, inde factum est, ut recentiores, hoc deterriti timore, perpauca memoratu digna

memo-

*x*) L. c.

*y*) Sequentibus in casibus phthisis pulmonalis cum hydropse erat coniuncta, nec Digitalis quidquam profecit. Hist. morb. 16. 37. 56. 64. 68. 112. 114. 118. 123. 148. — respiratio brevis abiit 150. — sequentibus autem casibus, in quibus Digitalis erat inutilis, sola phthisi afflicti erant aegroti 42. 95. 111.

memoriae proderent, quod eius in morbis supra nominatis efficaciam medicinalem, confirmaret probaretque, usque ad Witheringi, Medici Birminghamiensis doctissimi et experientissimi, observationes diligentissimas. Virium illius nihil amplius nisi id, cuius modo mentionem feci, cognitum habebant: Et obliuioni paene esset tradita, nisi ille praeclarus Vir eam ab illa vindicasset, cum singulares salutaesque et ad hanc usque aetatem incognitas inuenisset vires. Nos quidem libro, praeclare scripto *z*), satis distincto modo certiores fecit plantae huius efficaciae, ad morbum profecto non rarissimum, hydropem dico, sanandum. Ipse vires medicinales eius experimentorum in aegrotis institutorum frequenti copia comprobauit, primusque modum et rationem in hydrope vires illas exferentis, videlicet diureticas inuenit.

Omnino est mirandum, ne vllum quidem scriptorum veterum harum mentionem fecisse virium; etsi enim in hunc finem non adhibuerunt plantam, necesse tamen fuisse mihi videtur in alieno usu, vrinae copiosiores animaduenterent emissionem. Sine vilo quoque dubio vrinae emissio est aucta; illi autem forte id accidere putantes non satis curae adhibuerunt observationibus: vel potius, quod est vero magis simile, aegrotis ipsis est tribuenda culpa, qui, quod saepius accidit, medico haud accurate et circumscripte indicarent omnia, quae essent experti. Haec ita certo sese habere, inde quoque manifestum est, quod eo ipso tempore, quo quidem aduersus hydropem, clam vero, adhibebatur digitalis, vires eius diureticae non animaduertebantur.

*z*) An account etc. etc.



Anno post Chr. nat. 1780, priusquam Witheringii saepius iam laudatus liber prelis erat impressus, iam Cl. Darvins certiores nos fecit, illius plantae aduersus hydropem vsum in Anglia quam maxime esse solemnem et plures memorat casus, has eius vires adfirmaturos *a*). Nec non in diario erudito quod Londin. in vulgus editur [the London medical Journal] *b*). Commentarios a Cl. Simmons et D. Warren *c*) scriptos inuenies, vbi Digitalis tamquam nouum et efficax in hydropem remedium indicatur commendaturque. Negari tamen non potest, Ill. Withering. huius auctorem esse medicaminis; Commentarii enim modo dicti, illi ortum debent. Ipse erat, quocum 1775 anno, mulier quaedam annis iam confecta *d*), in pago (Shropshire dicto) hoc diu celatum aduersus hydropem medicamen, amplius viginti herbis commixtum, communicauit *e*). Ipse primus eius efficaciam soli Digitali con-

*a*) Experiments establisching a criterion between mucaginous and purulent matter and an account of the retrograde motions of the absorbent vessels of animal bodies in some diseases. Lichtfield 1780. 8vo. vide *Abhandlungen für praktische Aerzte 6ter Band 2tes Stück* pag. 303.

*b*) Vol. VI. pag. 55.

*c*) De ambabus conferas velim. *Abhandlungen für pract. Aerzte. 11. Band* pag. 98. et 130.

*d*) Withering. l. c. pag. 2.

*e*) Haec quoque historia in argumentum adhiberi potest, non semper remedium ab ano quodam commendatum, temere pro falso esse habendum. Fieri potest enim vt saluberrimum, adhuc vero ignotum, remedium penes illos sit. Inde etiam saepius difficillimis accidere existimo in casibus, vt talis conditionis homines, plus ad sanitatem restituendam proficiant, quam medici, summa doctrina et experientia praediti, valent.



conuenire obseruauit, et iam supra commemoratam animaduertit vim diureticam, quae sola et tutissima est ratio, qua optatum in hydropse sperare possis euentum. Sed antea hocce adhibebatur in dosi quadam, remedium, qua fere semper nauseam *f*) vomitum atque alui purgationem *†*) excitabat. Inde accidit, vt aegroti, quamuis optimum animaduernerent medicaminis effectum, tamen id porro fumere recusarent *††*). Atque si apud Cl. Warren leges *\*)*, sese esse in ambiguo, num semper et vbiuis necessarius sit vomitus, si medicamen vim suam diureticam exserere debeat, ipse interdum necessarium esse hoc ostendit. Witheringius vero, variis ac plurimis experimentis institutis, ex hac nos non modo eripuit ambiguitate, sed monstrauit quoque viam, qua securi possimus esse, timoris expertes, ne noxae aliquid aegroto adferamus, si fortasse sanitatis pristinae restituendae spe excidamus. Quod si tamen, causis primariis hydropem arcessentibus, remotis, ipsum remaneat malum, aut si causas reperire vllas nequeamus, atque si naturam ambobus in casibus, per vrinarias vias, aquae secretionem sua sponte eligere, animaduertamus, tunc si aliter humanae aliquid proficere possunt vires, aliorum experimentis inter se consentientibus freti adfirmare possumus, prae omnibus aliis diureticis medicaminibus Digitale effectum votis nostris respondentem esse praebituram *g*).

§. XVII.

*f*) Darvins l. c. pag. 302. Vir Ill. Simmons coniecturam affert pag. 112. Nauseam e plantae venenata indole oriri, quae, si herba esset siccata diminueretur, et herbae siccatae vsum recenti longe praeferendum esse.

*†*) Warren l. c. pag. 124.

*††*) Warren pag. 130.

*\*)* L. c.

*g*) Withering. pag. 191.

Ratio modusque, quo hocce remedium praecipuam exhibet vim, iam supra diuersis in locis est indicatus: mihi quidem videtur id ratione, ab irritandi eius natura, non pendenti vim diureticam exserere, qua scilicet natura organa vrinam fecernentia irritantur et in validiorem impelluntur motum, quod e. gr. cantharides et valida remedia alcalina efficere solent, sed potius singularem huic medicamini inesse indolem, qua sanguis pituitosus et renum pituita dissoluatur, humorum acrimonia corrigatur, vasa, ad vrinae secretionem accommodata, si quae fortasse sint vitiata, corroborentur, et sic aqua ad emissionem satis apta educatur. Summa etiam probabilitate et verisimilitudine confirmari potest, eam praecipue remedii resoluentis partes agere, si ex analogia de eius in alijs morbis praestito concludere licet effectu. Si quod medicamen in vlla valetudine aduersa operetur ratione nobis satis perspecta, quid est, quod nos impediat, quo minus suspicemur, etiam in alijs, haud frustra adhibitum, casibus, et vna eademque ratione vim exhibuisse suam salutarem? — Atqui huius medicaminis beneficio in glandulosarum partium tumoribus, dolorem non adferentibus, scrophulis dictis, utimur, quibus, tamquam dissoluens, discutiens, singularem emendans acrimoniam, medetur; nonne etiam eius diureticae vis ratio mendendi in hoc est quaerenda? — Quoties non deprehendimus etiam in hydropicis, hepatis, lienis, pancreatis, et in ipso mesenterio obstructions adeste, et in pulmonibus indurationes, quibus sanguinis aut lymphorum circulatio nimis retardatur, et humorum secretio eorumque exitus diminuitur. Harum quidem vitiosa partium conditio, e nimia morbi duratione ortum habere potest, cum antea non adestet, saepissime vero morbum etiam antecedit, et pro causa efficienti est aestimanda. Quocun-

cunque autem modo res est, nisi aliis indigeamus specificis remediis, Digitalis obstructions remouere, et humoribus caeteris expeditum reddere transitum valet; in primis autem tales procreabit effectus, si eius generis sint obstructions, vt Digitalis iis plane specificè mederi possit.

### §. XVIII.

Nonnulli, vt iam supra commemorauì, necesse esse putarunt, nauseam vomitumque prius excitari, quam medicamen diureticam suam praebeat efficaciam. Sic Cl. Warren obseruauisse professus est, nunquam hydropem auferre nec quidquam proficere, nisi antea commouisset vomitum. Omnino negari non potest, vomitum tum in hoc statu esse salubrem, cum repentina corporis commotione vasorum minorum obstructions aufert, viasque aperit, et resorptionem efficit *h*); quibus rebus hydropici saepius receperunt sanitatem *i*), tum autem alia adhiberi possunt vomitoria. Ipse Withering initio hunc praecedere debere effectum statuit *k*), postea vero experimentis persuasus est repetitis, Digitalem purpuream vim diureticam vehementer ostendere, nec in hunc finem nausea aut vomitu antea indigere; quamquam quidem, illo durante, secretio vrinae augeretur *l*), et per aliquod temporis spatium contineretur.

Exem-

*h*) Cruikshank. vide *Abhandlungen für pract. Aerzte* 7 Th. 1 Stück p. 14,

*i*) Quid? quod hydrops articulationis hac sanata est ratione l. c. etiam acta hauniensia Th. I. p. 294. aqua ascitica euanuit.

*k*) L. c. p. 185.

*l*) P. 5.



Exempla exstant, vbi, et si nausea etc. excitabatur, vis tamen diuretica saepissime nihilo erat validior *m*) efficaciorque, quin etiam ille saepius antecedebat effectus, quem demum horis aliquot praeterlapsis sequebatur nausea; adeo urinae secretionem nonnunquam impediēbat *n*), aliquamdiu iam inchoatam, praecipue si medicina quibusdam maioribus aegroto dabatur dosibus *o*). Vt falsa illa opinio eo certissime sit reiicienda, hoc quoque annotari meretur, Digitalem eiusmodi in casibus, vbi iam scilla et ipecacuanha ad nauseam vsque data, nihil ad sanitatem adtulissent, fuisse saluberrimam *p*). Haec igitur nausea neutiquam est necessaria, sed potius ex nostra incuria oritur; et a nausea alio medicamine excitata, plane discrepat; dum modo desinit, modo eodem impetu, breuioribus aut diutioribus spatiis interiectis, redit, aegrumque submisso et anxio reddit animo, quae vero incommoda, ciborum appetitus amissi reditu, plerumque compensantur, et quidem maioris ea ciborum cupiditate, qua ante medicaminis usum, aegrotus est gauisus *q*).

#### §. XIX.

Caeterum casus accidere solent, quorum iam §. XI. feci mentionem, v. c. vomitus, vertigo, colorum permixtio et caetera, quorum causa in maiori aut citius repetita desilaret. Inde maximi est momenti, vt modus sufficiens, quo medicamen aegrotis datum, vium efficacem et salutarem absque omni periculo,

*m*) Simmons l. c. p. 102.

*n*) Withering l. c. 184. 85.

*o*) P. 4. l. c.

*p*) P. 5. l. c.

*q*) L. c. 185.

culo, optime exhibere possit, rite describatur constituaturque. — Cl. Darvins foliorum recentium quatuor uncias, duobus pintis aquae decoquebat usque in uncias octo, decoctoque addebat uncias duas spiritus vini, cuius, interpositis duabus horis tria, aut singulis horis duo cibaria cochlearia aegroto sumenda praecipiebat. Medicinam decem vel duodecim horas adhibitam, nausea diu durans, et frequens urinae secretio sequebatur, interdum etiam alui eiectiones purgantes. — Cl. D. Simmons decoctum e tribus unciiis foliorum aridorum et mensura dimidia cum quadrante ad mensuram dimidiam praeparabat, cuius sex cochlearia quotidie aegrotantibus dare dicebat. — Cl. D. Warren decoctum et tribus foliorum recentium unciiis et aquae fontanae una libra cum dimidia, usque ad remanentiam unciarum novem decoctum praeparabat, huic colaturae aquae iuniperi et succi corticum aurantiorum una unciam unam et dimidiam addebat, cuius medicaminis interpositis quatuor horis duo cochlearia maiora aeger quotidie tam diu sumebat, donec vomitus, alui purgatio, vel urinae frequens sequeretur secretio. Hanc medicamenti dandi rationem non utique optimam fuisse ac tutissimam, in eaque adhibita illud semper operari aliqua cum violentia, quae tamen ratio aegroti naturae in omnibus circumstantiis conueniens esse nequeat, facile est intellectu.

Semper igitur cautio quaedam in huius medicaminis usu est adhibenda, eaque constituenda dosis, quam, omni timore liberati, aegroto praecipere possimus, attamen eiusmodi formam optemus necesse est, qua maximos efficiat effectus, et efficaces quam minime amittat partes. Cl. Witheringius primus nos docuit, quomodo omnes modo memoratos, facile consequi possemus fines, certis cautionibus praescriptisque de-

finiendis, quibus satis cognitis nunquam a recto aberrabimus tramite.

§ XX.

Omnium plantae nostrae partium ex communi experientia, folia sunt efficacissima *r*), quamquam eius aliae quoque partes similes fortasse proferre possint effectus *s*). Ex planta in caulem excrecente, folia imprimis colligenda sunt, quae deinde, petiolis et media costa cum cura seiunctis, vel in sole, vel in orbe stanneo, igni languidiori apposita et arida reddita, pulchrum ac viridi coloris puluerem efficiunt, qui paulo minus, quinta foliorum parte, ponderis habere solet, quae ipsa neuti- quam sunt comburenda, sed tamdiu modo torrefacienda, donec conteri possunt. Huius pulueris adulto gran. vnum — tria bis quotidie praescribere solet Withering: puri vero vel cum aromate quodam admixti, plerumque grana quatuor in quem- vis diem sufficiunt *t*). Nonnunquam pillulas sufficienti sapo- nis aut gummi ammoniaci copia paratas praescribit, ac si li- quida malint aegroti, drachmam vnam foliorum siccatorum in semi pintam calidae aquae per quatuor horas infundendam curat, colaturae unciam aquae spirituosae addit, cuius infu- sioni uncia vna bis singulis diebus adulto est media dosis. Quod si autem aeger solito validior sit, aut magni momenti sympto- mata accidentia eum vrgeant, hanc dosin per octo quasque horas

*r*) L. c. p. 181.

*s*) Radix e. g. quae praeterea, ut nonnulli antumant hydropi mede- tur. ut nulla inde oriatur nausea; Withering. tamen hanc non minus foliis hoc efficere observavit. — Flores etiam et semen idem operari possunt.

*t*) L. c. 182. Cl. Warren. l. c. p. 134. foliorum inquit hiberno tem- pore, collectorum minorem adhibendam esse, quantitatem (Less quantity).



horas dari iubet. Contra vero saepe fit, ut vnciae dimidium iam sufficiat; ita triginta pulueris grana aut octo vnciae infusi aegroto, priusquam nausea adficiatur, dari possunt. Tincturae spirituosae, et vinosae, et acetosae ipsi etiam probantur, quae et iam efficaces sunt repertae *u*). Minime vero illi probatur extractum. Medicamen enim, ait, cuius maxima dosis trium granorum in substantia est, condensationem non admittit. Neque nimis magnae neque citius repetitae sunt dandae doses, alioquin symptomata §. XI. notata accidere solent, attamen, ut facile intellectu est, leuiori gradu, nisi nimis vehementi ratione adhibeatur remedium *x*).

Medicaminis huius optatissimus rarissime tunc est expectandus effectus, quando vim exserat purgandi *y*), quam ad coercendam vnicuique dosi opii paululum addatur *z*). Si intestinorum nimia esset inertia et venter lentius moueretur, ille vno eodemque tempore Jalappam praescripsit, qua vis diuretica remedii, nequiquam impeditur. Attamen e tali huius cum aliis medicaminibus coniunctione non semper satis amplum perspectum habuit effectum.

## §. XXI.

In hoc remedio adhibendo pulsus perpetuo diligenter est explorandus, quod non nunquam mirum in modum langueat, etsi non aliud illum antecessit symptoma. Ideoque caueas, ne dosin festinanter repetas, sed ut iustum operandi tempus cuique tribuas, et circumscriptis dosibus, interuallisque constitu-

G 3

tis

*u*) Vide Warren pag. 133. nauseae minus fortasse adducit.

*x*) Withering. pag. 184.

*y*) L. c. pag. 186.

*z*) L. c. pag. 184.

tis tamdiu pergās, donec medicina sumta aut in renes aut ventriculum aut in pulsum et in intestina vim excerceat, sed definiat statim simulac talis appareat effectus *a*). Secundum Witheringii recentiora experimenta, ad hydropis sanationem paulatim curandam, Digitalis, leuioribus dosibus e. gr. ad duo aut tria grana, adhiberi debet. Vnde fiet, vt vrina paulatim fecernatur, quod vsque ad totius curationis finem continuabitur.

Ad remedii vim magis suffulciendam, necesse est, aegroti, dum medicinam adhibent, frequenti potu, quemcunque malunt, nisi fini nostro aduersetur, vtantur. Saepius enim fit, vt initio, quamdiu humores acrimonia quadam nondum sunt infecti, nulla aegroti laborent siti, ac potu, veteri quadam opinione falsa deterriti, abstineant; verum enim vero recentiorum satis euictum et confirmatum est experientia, frequentiore potum non modo non obesse, sed etiam prodesse.

Aquae euacuatione repente facta, aegrisque haud firma corporis constitutione gaudentibus, fasciarum vsus valde necessarius est *c*), vt hac ratione virium defectus aliaque symptomata euitentur. Nisi autem aqua penitus et vna vice egeratur, Witheringio in aliquot dies medicamine non vti placet, vt his intervallis corpus, medicamentis nutrientibus et tonicis adhibitis corroboretur; haec vero medicina optatum non semper praebuit successum tutissimum. — Remedium, quo nimis violentus et periculosus Digitalis effectus cohiberi possit, nondum est repertum aut cognitum. Experientia Cl. Witheringii, ventriculus, vsitata remedia analeptica et volatilia, tali

consti-

*a*) L. c. pag. 186.

*b*) pag. 187.

*c*) Withering l. c. pag. 192.

constitutus conditione, recusat, potius aromatica et amara praefert. Nonnunquam spiritui vini inest, haud nimiam nauseam sedandi vis, plerumque etiam opium parvis dosibus datum, plurimum profecit, plus autem utilitatis vesicatoria adtulerunt *d*). D. Jones quidem compertum habuit; potum e mentha crispa confectum maxime profuisse.

## §. XXII.

In omnibus fere hydropis generibus Digitalis cominode adhiberi potest, excepto hydrope cystico; quoniam nulla interne adhibita remedia humores educunt inclusos. Qua de causa in ascite mulierum, ea haud feliciter utimur; quia cum hydrope ovariorum plerumque coniuncta esse solet *e*). Sed Vir Cl. Warren se eam optimo cum successu, in eiusmodi casu, quem hydropem dextri ovarii esse putavit, adhibuisse testatur *f*). Aegrotans enim dextro in latere magis magisque erat inflata, urinae secretio diminuebatur, macescebat et demisso erat animo. Pillulae scilliticae et acetum scilliticum plane nihil proficiebant, Digitalis autem usus, quatruiduo praeterlapso, eam pristinae reddebat sanitati. — Neque, ut Witheringius observavit, maior nobis in ascite sanandi spes adest, ubi venter durus, expansus, circumscriptus est, ubi tumor digiti impressioni repugnat ac continens est. Nec in hominibus robusto corpore, et viuida natura praeditis, secundum sperare debemus successum, si fibrae sint extensae, cutis calida aridaque atque facies rubore perfusa, et pulsus sit durus, intensus. Contra vero, Digitalis vim diureticam efficacem fore, tunc magis est sperandum,

*d*) L. c. pag. 188.

*e*) L. c. pag. 7.

*f*) *Abhandlungen für praktische Aerzte XI. Band. pag. 127.*



dum, si pulsus debilis, intermittens, et aegrotus pallidus est, circa os oculosque liuidus, si cutis sit frigida mollisque tumor, ut aquae motum internum facile tactu percipias, aut oedematofusus tumor, digitorum leni pressioni facile cedens, foueam relinquat *e*). Item etiam, eam, in morbo e vasis exhalantibus relaxatis orto, saluberrimam esse Cl. Warren opinatur *f*), qui aegroti status initio ei similis apparet, qui cachexia appellatur, quae vniuersalis hydropis primordium est habendum, et a Cl. Cullen (hydropi diathesis) nominatur.

### §. XXIII.

Quamquam autem hoc remedium, in vniuersum spectatum, est efficacissimum, et multis aliis aduersus hydropem adhibitis remediis sine dubio est praestantius, in omnibus tamen hydropis casibus, sine omni exceptione idem tutissime et optato cum successu adhibitum iri, nullo modo confirmare audeamus. Longissime tamen abest, ut haec, quae modo monui, eius praestantiae obsint; ubi enim vlla reperitur medicina, quam, quibusuis in symptomatibus sanitati prodesse eamque reddere certissime et absque omni exceptione contendere possimus? nonne quidam semper restant casus, in quibus nihil salutis adfert? Eodem modo nec Digitalis diureticum vniuersale medicamen haberi debet *g*), in quibusdam tantum, supra narratis circumstantiis accidentibus, praestitit efficaciam; etsi aliquando vi sua diuretica non integram restituat sanitatem, hoc tamen certum est, eam semper aliquantulum vrinae secretionem augere. Si vero cum apoplexia hydrops sit coniuncta, aut si aliorum morborum symptomata adsint, neque Digitalis,

neque

*e*) L. c. With. pag. 189.

*f*) *Abhandlungen für pract. Aerzte* l. c. 128.

*g*) Withering. l. c. pag. 191. Nr. I.

neque ullum aliud remedium diureticum aliquid proficere potest, nisi ut symptomata maxime periculosa diutius detineant *h*), qua mora fortasse alia remedia ad causam primariam pellendam idonea, inuenire possimus. Ceterum in aliis etiam morbis, quibus plane nulla subest hydrops, medicamen saluberrimum est Digitalis. Vim simul suam ita exferit in corde, et illius motum ita coercet, ut etiam in aliam finem eam salutarem fore, suspicari possimus; quoniam nulli remedio alii, praeter illam, tanta et tam valida inest efficacia *i*). Quod si haec in unum colligas; ut Digitalis praestantiam intelligas, eamque ob maximi momenti effectus, magni aestimes necesse est \*), praesertim, cum, si nos fallit hoc remedium, nullius optatus sit expectandus successus *k*); et hoc remedium dosi constituta ac modo descripto datum, urinam leniter sernit, ita ut minorem, scilla, aut alio medicamine efficaci, corpori perturbationem et molestiam adferat *l*). Si igitur Digitalis hanc indolem et efficaciam penitus perspexerimus considerauerimusque, illi inter omnia hucusque cognita diuretica, eaque efficacissima, praestantiam debere, facile patebit.

Quae cum ita sint, nonne illi maximas habere debemus gratias, qui primus, remedium tam saluberrimum nobiscum liberaliter communicavit? —

#### §. XXIV.

*h*) L. c. Nr. 6.

*i*) L. c. Nr. 8-9. pag. 192.

\*) Cl. Quarin etiam in quadam hydropis specie efficacem Digitalem, cum aliis remediis coniunctam, reperit pag. 121.

*k*) L. c. Nr. 4.

*l*) L. c. Nr. 5.

§. XXIV.

Equidem vt mihi ipsis in aegrotantibus plura instituere licuisset experimenta, optassem, quae nunc addere possem, sed hoc mihi non contigit. Vnus tantummodo mihi sese obtulit casus, qui respectu experimentorum, quae Vir Cl. Witheringius tentauit, multitudinis, pro nihilo est habendus. Quamuis autem euentus eius votis non satis respondit meis, eum tamen hic addam; quoniam, Digitalem in ascite adhibitam rarissime aliquid proficere, praecipue confirmare et extra omnem videtur ponere dubitationem, si aegroti ea videlicet est conditio, quam Witheringius descripsit.

Fridericus Alborn e pago Lengelern ad praefecturam Harstae pertinente ortus, et viginti quatuor annos natus, et qui texturam didicerat linteariam, simulque militiae nomen dederat; satis secunda et stabili valetudinis constitutione frui videbatur, et, vt ipse confessus est, a parentibus robustis et sanis procreatus, semper corporis sanitate erat gauisus. Is ante annum de symptomatibus hydropem incipientem indicantibus questus est: remedia idonea ac malo conuenientia visa adhibebantur. Sed satis prospero deficiebant effectu successuque, abdomen magis magisque indies ita tumescebat, vt paracentesis abdominis institui deberet: hac peracta, remedia quaeuis, partim roborantia partim hydropi respondentia, frustra adhibebantur, et breui temporis spatio interiecto, abdomen in pristinam et immensam extensum est magnitudinem. In hac miserrima positus constitutione aeger ille nosocomium nostrum accessit, et cura sanitatis eius restituendae, mihi est demandata. Vrina pauca itemque fusca, alui deiectio naturali conueniens erat, paululum tamen fluidior, cibi cupiditatem habuit mediocrem, sitim exiguam, imo nullam. Absque omni difficultate in quauis corporis parte aegrotus iacere potuit, pulsus retinuit iustum pul-



pulsandi modum non admodum celerem. Haec quidem prognosis, quam his in rebus sic constitutis nobis conciliare potuimus, non optima, sed potius infaustissima esse videbatur. Morbi enim pertinacia, cum nullum adhibitorum remediorum quidquam proficeret, et aqua nulla depromi posset ratione; deinde proximae causae inscitia; aduersus quam agendum fuisset, tam repentina, mox post operationem factam, aquae accumulatio, bonum expectare euentum non permiserunt, praeterea aegrotantis status vnus idemque erat, in quo iam Cl. Witheringius non felicem Digitalis, cuius efficaciae in hoc malo periculum facere mihi in animo erat, sperandum esse euentum enunciauit. Abdomen illi erat durum, extensum. Aegroto ipsi multum naturalis roboris supererat, fibrae strictae, et cutis calida. His valde ambiguus rebus Digitalis pulueris quatuor grana singulis in diebus aegroto danda curauimus: et inde a vicesimo secundo mensis Aprilis anni currentis die, mane duo, meridiano et vespertino tempore vnum summsit granum. Hac dosi per nonnullos sumpta dies, vrinae secretio vsque ad dimidium est aucta: sed haud multo post rursus diminuebatur, et nullo modo amplius augeri potuit. Paracentesin abdominis igitur instituere necessitate coacti sumus; aquae incrementum autem aliquot post dies rediens roborantibus aegroto datis remediis impedire non potuimus. — Experimentum secundum in Digitalis puluere institutum minime respondit votis nostris; abdominis tamen tumor inter eius vsum non amplius est auctus. Cum igitur ad aegrotum a malo suo liberandum, hoc medicamen non sufficeret, alia tentauimus remedia; vt sunt emetica, purgantia et plura alia; omnia autem, sicuti antea, sese habuerunt. Cineres modo nicotianae eximiam ei tulerunt opem; haud parua enim copia secernitur vrina; vnde sanitatis integrae restitutionem certissime sperare possumus.

---

# HISTORIA MORBI

A

CL. D. BRANDIS

MECVM COMMVNICATA.

---

N. N. *Boetcher* mercenarius Goettingensis per plures iam annos leuiori laborabat respirandi difficultate quae mense Martio a. 1786. post frigus et insequentem calorem adeo creuerat, vt aeger lecto affixus vera infestaretur orthopnoea. Die 6 Martii eum inueni plurium dierum et noctium agrypnia debilitatum, spiritum in situ erecto difficillime et sonorum tantum trahentem, qui omnino intercipiebatur dum corpus reclinaret, valdopere et difficillime tussientem cum sputo copiosissimo mere aquoso, per diem plures libras superante, Praecordia tensa non sine fluctuationis vestigio, quibus leuiter tantum pressis tussis grauiter augebatur. Dolorem vagum in scapulis et humeris querebatur et manus subtumescebant. Ex primis viis nullum fordium vestigium. Pulsus perquam debilis et inaequalis adeo vt grauiora mala ex eo praedixeris. Morbi causam vix aliam detegere potui, nisi transpirationem forsan suppressam; Aquam in substantia pulmonum collectam suspicabar, et dum primae viae nullam curationis indicium suppeditarent, diureticis morbum impugnare decreui. Pulueris inde sol. Digitalis purpureae



pureae gr. II. bis de die aegro praescripti, et vt eorum vim eo tutius obseruare possem nullum aliud medicamentum adiunxi.

D. 8. mart. paulo melius habere aeger credebat, etsi vrinae copia nondum aucta videretur, pulsus maior et magis aequalis, respiratio quidem adhuc sonora et difficilis, reclinanti tamen non omnino supprimebatur, tussis difficilis adhuc et continue fere infestans magnam aquae copiam euacuabat.

D. 10. omnia symptomata mitiora apparuerunt somnus placidus per plures noctis horas, nonnunquam tantum phantasmatis interruptus, respiratio facilius multo minus sonora, tussis humida frequens, pulsus fere naturalis aequalis: vrina nunc copiosior secedebat, ita vt ipse aeger ad duplum saltem auctam eam existimaret; dolorem querebatur in pectore, non tamen valde grauem nec noua mala minitantem. Vt impatienti aegro plura medicamenta a me efflagitanti satisfacerem pilulas praescripti ex succo glycyrrhizae ad drachmam de die dimidiam et radices graminis Cichorei etc. pro potu ordinario decoquendas; pulueris fol. Digit. purpureae vsum autem semper continuandum imperabam. Insequente die pilulae id effecerant quod aeger ab eis certe expectabat, aluum nempe pluries deiecerant! Omnia symptomata mitiora; tussis adhuc frequens sputa copiosa, vrina multo adhuc copiosior ita vt de effectu Digit. vix dubitare liceret. Sic omnia praeter pilulas continuabantur, quae ob singularem in aegrum vim purgantem mittebantur, vsque ad d. 14<sup>um</sup> Mart. quo aeger grauiorem pectoris dolorem tussim difficiliorem querebatur, cui vt subleuarem quouis vespere opiatum ex TR. Thebaica propinabam, fol. Dig. purpureae tamen semper continuabam. Hisce medicamentis vsque ad d. 27 Martii continuatis aeger ple-



narie restitutus ad labores reuertebatur, et ad hunc diem  
21 Julii sanus viuit.

In duobus aliis aegris vim diureticam Digitalis purpureae expertus sum, non ita tamen vt ei tanta tribuere possim. Alter iuuenis studiosus hydrope laborabat articuli in genu dextro, quem medicamentis praesertim externis vesicatoriis saepissime repetitis et fumigationibus volatilibus aggrediebar, simul tamen diuretica interna adhibui non sine fructu, et inter ea fol. Dig. purpureae quae vt ipse aeger in omnibus symptomatibus obseruandis diligentissimus asseuerabat, vrinam melius ciebant quam antea data salia diuretica, leniora squillitica rad. fene-gae etc. quae antea praescripseram. Alter faber lignarius hydrope pectoris et ascite manifeste laborabat, cum oedemate pedum et dolore in scapulis, post vsum gr. XXIV. circiter fol. Digit. purpureae oedema pedum disparuit et aeger multo melius se habere credebat, vrinae copiam tamen auctam non obseruauerat, quod tamen negligentiae hominis rure degentis forsitan adscripseris. Finem morbi obseruare non contigit, cum rusticus non amplius ad nos veniret.

In alia aegra in clinico nostro adhibitam esse Digitalem scio, quae ascite laborabat, sed vix aliquem effectum ab vilo diuretico in eius morbo proteiformi expectauerim, qui ex pertinacissimis obstructionibus vasorum coeliacorum ortus, morbum nigrum, cardialgias dirissimas, ascitem, ipsumque hydropem pectoris produxerat, et aegram hystericam per plures annos lecto iam detinuerat. Vrinae excretionem tamen inde auctam esse a medico curante audiui.

Haec

Haec sunt quae tibi doctissime Candidate de Digitalis vi diuretica a me ipso obseruata communicare possum. Non sufficiunt fateor, vt eam extra omnem dubitationis aleam ponere possint, sed aliquid saltem contribuere posse puto, vt ab aliis medicis experimenta continuentur.

*I. D. Brandis,*

Med. Doct.

---

*THE*

# THESES.

## I.

*Male efficacia emeticorum ad sordium ex primis viis eliminationem restringitur.*

## II.

*Tuto aliquando cortex peruuianus in inflammationibus adhibetur.*

## III.

*Eruptio petechiarum nihil critici secum fert.*

## IV.

*Placentae solutio naturali in casu, viribus tantummodo naturae est relinquenda.*

## V.

*Dysenteriae caussa proxima est acrimonia rheumatica.*

## VI.

*Fluxus hepaticus nihil aliud esse videtur, nisi haemorrhoides intestinalium tenuium.*

## VII.

*Lingua impura non semper sibi vindicat euacuantia.*

## VIII.

*Epilepsiae caussa proxima in primis viis saepissime latet.*

---











